


Dd
1590

7 8496^a
H



Se. 301.





21
Ein schöne newe

Action auff das Xviij. vnd
Xix. Capitel des Euangelisten Lucae ge-
setzet / vnd Keimweis in drey Actus ver-
fasset / Allen büßfertigen sündern tröstlich
aber den verstockten Gottes vnd des
Euangelij feinden schrecklich zu les-
sen / Durch Joachimum Gress
von Zwickaw / yezund
Schulmeister zu
Dessaw.


✻

Auch ein Kurtz Summarium des Xj.
Capitels Johani / von der aufferweck-
ung Lazari / gleich als ein Lied ver-
fasset / Zu ende dieser Action
angehenget. .

1546.

214

Siese Action / so man ihr ein eyge-
 nen vnd gewissen tag halten wil
 (wie sies dan wol werd ist) gleich
 wie auch Ostern vnd die Weinachten /
 ein yeder Fest sein sonderliche Action
 darauff gestelt hat / so kan man diese
 agiren / an heyligen Palmen Son-
 tag / da dann dis alles am mei-
 sten geschehen ist / vnd ist
 auch auff denselbigen
 tag / eben sein de
 tempore. *)



Den Erbaren /

Achtbarn / Hochweisen
vnd Ersamen Herren Burgermeystern
Radtmanen vnd gantzer Stad
Leipzig meinen Günstigen lie-
ben Herren vnd
Freunden.:

W Gnade vnd friede durch Jesum
Christum vnsern Herrn vnd
Heylandt / Amen. Erbare/
Achtbare / Hochweyse / Ersa-
me / Großgünstige lieben Herren vnd
Frennde / Der heylige Euangelist Lu-
cas in seinem xix. Capitel / Zeyget allen
sündern (welche zweyerley sind) einen
solchen trost an / Dergleichen noch
Himmel noch Erde genugsam begreif-
fen / auch aller Welt hab vnd gut nicht
bezalen mag / da er spricht / Das Je-
sus Christus des Menschen Son / sey
kommen zu suchen vñ selig zu machen /
das verloren war.

A ij Diesen

ein eyge
ten wil
gleich
chten /
Action
an diese
Son-
ei-
t

4
Diesen heyligen schönen vnd tröstlichen spruch / so ihn der Teuffel / aus aller menschen hertze reisen / schenden / vnd zur grösten lügen machen künde / lies ers nicht / vnd hette gantz ein gewonnen spil / wie ers dann bey etzlichen vielen vnd vnzelichen / Ja leyder bey den meisten / dahin bringet vnd gebracht hat / das er sie in ansehen ihrer sünde / vnd aus verachtung Gottes worts / yemmerlich vnd erbarmlich zur ewigen verdammnis / durch verzweifflung treibt vnd getrieben hat / nemlich die / so diesen Spruch im glauben nicht fassen wollen noch können / sondern ihnen selbst durch ihre eigene kreffte / von ihrem sündhafftigen wesen vnd leben zu helfen gedenccken / welche sich doch für rechte sündler nimmermehr erkennen.

Vnd dis ist nu der eine vnd erste teil der sündler / wie ich sie im anfang (wie gehort) vnterscheiden hab / dz sie zweyerley vnd vngleich sein / Es sind aber dis die ergesten / denen auch dieser Spruch nichts

5

nichts nützet noch frommet / Die an-
der: aber / so ihre sünde mit rechtschaff-
ner bus erkennen vnd bekennen / auch
denen sie von hertzen leid seind / densel-
bigen allein ist dieser Spruch / vnd dis
Euangelium zu gut geschrieben / das
sie wissen sollen / das der liebe Menschen
Son / vnser Herr Jesus Christus / ge-
wis derhalben vnd sunst vmb anders
nichten kommen ist / dann die sündler se-
lig zumachen / wie er an einem andern
ort spricht. Dieser zweyerley sündler Ex-
empel / haben wir nu alhie einen son-
derlichen ausbund in dieser Action. Es
handelt aber diese Action / von der Hi-
storien Zachei des sündthafftigen Zol-
ners / auch von andern ding mehr / als
von der Jüden hartneckischem Kopffe /
von ihrer grossen vnd wunderwahren
vnd danckbarkeit vnd verstockung / auch
endlich helt sie vns für / die draung
vnd warnung des Herrn Christi / von
ihres Reichs vntergang vñ zustörung.

In Zacheo dem Zolner / ist das eine
A iij Exempel

Exempel / nemlich der frommen vnd
gerechten sündler / In den verstockten
Juden / haben wir das andere der vn=
busfertigen Gottlosen / Welche beyde
so wir sie gegen einander halten / sehen
vnd befinden wir / das wie hoch sie wid=
der vnd von einander sein / so hoch vnd
sehr ist es auch von nöthen / eines ytz=
lichen parts eigenschafft / gründtlich
vnd recht zu wissen / zu lernen vnd zu er=
kennen / auch dergleichen zu fliehen vnd
zu vermeyden.

So hat nu ein yederman / an den
beyderley personen / ein ebenbilde vnd
spigel / darinn er alle sein thun vnd we=
sen / erkennen vnd probiren mag / Nem=
lich also / das ein yeder Mensch / dieser
beyden einem gleichformig ist / odder
mit der zeit gleichformig werden mus
vnd sal / Entzweyer das er ein verstock=
ter Judas / vnd gar ein Teuffel sey vnd
bleibe / odder das er / wie Zachens / seine
sünde erkenne / Welchs dann aus son=
derlicher Gottes erleuchtung / vnd ein=
gebung

7
gebung des heyligen Geistes / geschicht
vñ geschehen mus / als das er dem Her-
ren Christo von hertzen bekand / wie er
sein lebenlang / so manchen Menschen
mit seiner handtierung des Zols / durch
allerley hinterlistickit / vnd mancher-
ley finantzen hindergangen / betrogen /
geschunden vñ geschabet / vil vnrechts
gehandelt vnd gethan / Da er das liebe
armut / so vnchristlich vnd vnerberm-
lich beschweret vnd vbersetzet / nach-
mals (wie gesagt) da er Gottes Wort
höret / rechtschaffene buss wircket vnd
thut / Christum den Herren seinen lie-
ben Gast / für seinen vnd aller welt sün-
denbüßer / in rechtem glaubē annimpt /
Dardurch er also vergebung seiner sün-
de / so gros vnd hoch sie auch ymmer-
mehr sein gewesen / gnediglich erlanget.

So wir nu / Günstige liebe Herren /
seinem Exempel dergleichen nachfol-
gen / kan vns dieselbige gnade auch wid-
derfaren / Vnd wiewol ihr vil / hierin-
nen ihren auszug haben odder gewin-

¶ iij nen

8
nen mügen / solcher gestalt / das sie sich
mit dem weisbörnen vnd entschuldigen
wollen / das sie solchs gar nicht an
gehe / berüre odder treffe / aus dem grun
de / weil sie keines solchen Zöllners ampt
fürē / auch ihr lebenlang nie gbraucht
haben / noch zugebrauchen gdencken /
in massen wie dieser Zacheus hie vom
Euangelisten Luca dargegeben wirdt /
So wird sich dennoch ein yederman /
für einen armen vnd grossen sündler /
auch one das sunst bekennen müssen /
ob wir vns gleich des namens Zöllner
eussern vnd schemen / Dañ sintemal vn
ter dem wort Zöllner / mehr vnd nür vil
mehr drunter verstanden / so mans im
grunde besiehet / so befürchteich vnd
ist gewis / das wol alle menschen dar
unter begriffen mügen werden.

Vnd solchs zu erörtern / mus ye
derman dis nachgeben / Das in dem
namen Zöllner / Gleitsleutte / Kendtmei
ster / Schösser / Voigte / alle Amptsuer
wesser / Verleger / Factor / Schaffner /
Vorsteher /

Vorsteher / Haushalter / Kauffleüte /
 alle handtirer vñ handler / ia alle handt
 werckger gefasset sind . Ob nu gleich
 (wies doch mislich) ein yder in dieser
 stande einem / wehr gleich in welchem
 es wehr / rechtschaffen / götlich / ehrlich
 vnd vngeschrlich / nach der lahr des
 heyligen Sanct Pauli / one verfortey-
 lung seines nechsten / mit ihm vmbgien
 ge vnd handelt / so bleibet doch (wie
 newlich gehört) ein yeder auch seiner an-
 dern / das ist der erbsünde halben / von
 Adam vnserm ersten Vater ererbet / frei-
 lich wol ein Zölner / grosser / verdamp-
 ter vnd verfluchter sündler / so fern vns
 der liebe Herr Christus nicht suchet /
 zu Christen / dz ist zu heyligen machet /
 Dann so er solchs nicht thut / vnd wir
 vns auch von vns selbs darzu nicht be-
 kennen / vñ vns Christum finden lassen /
 so wird vorwahr gar keine vnterscheid
 sein / vnter vns vnd vnter gottlosen .

Wehrs auch vns nicht sonderlich
 erlassen wil / kan vns gleich als Abgöt-
 2 v tische

tische vnd Gotteslesterer schelden / wie
dann der Euangelist hie das ander teil/
die verstockten Juden / als solche Got=
tes feinde / billich aller Welt fürmahlet
vnd für augen stelt / Welche in ihrem
hartneckischem verstocktem sinne / vn=
angesehen vnd vnbehertziget / einer eini=
gen warnung aller Propheten / des Her=
ren Christi / vnd der Deyligen Apostel /
vnbusfertig geblieben / nu ihren wol=
verdienten lohn entpfahen / vnd lengst
entpfangen haben / nemlich die zustö=
rung ihres gantzen Königreichs / be=
raubung ihres Priesterthumbs vnd al=
ler wolfart / dafür sie hie ewige schan=
de / vnd dort ewige pein / in hellischer
marter neben allen denen / so den tag
des lieben Euangeltij / vnd ihre heim=
suchung nicht erkandt / auch noch
nicht erkennen wöllen / zu ewigen zeit=
ten / gewertig sein müssen.

So wehr nu derhalben vorwar / mei=
nes erachtens / gar hoch von nöthen /
nicht allein bey ihnen den verstockten
Juden /

Juden / so doch des meisten theils aus dem Reich Gottes bereit an verstoßen / Sondern auch bey allen Gottlosen vñ vndanckbarn Christen / so auch mit hauffen zu der Welle rennen / das man nu schir einmal disz xvij. vnd xix. Capitel Luce / Sonderlich die warnung vnd dreyung im ende des xix. zu hertzen fassete / das man Gott dem Herrn seinen zorn abbötte / so man anders ein bessers vnd ewiges leben / nach diesem bey ihm im Himmel hoffete / darmit doch etzliche von den vberbleibungen / beyde von vns vnd ihnen / in wahrer reue befunden / auch endlich noch möchten selig werden.

Welchs so es verbleibet / das wir neben ihnen / vnd sie neben vns / des wuchern / schindens vnd schabens / vnrechter / vnchristlicher handtirung / des sauffens vnd fressens / aller vnzucht vnd Durerey (welchs doch noch wol das geringste vñ schlecht ding ist) nachmals aber aller Abgötterey vnd Vndanck

danckbarkeit / für das liebe Wort Got-
 tes (welchs dann gar vil grösser ist) So
 wir (sag ich) dis alles für Gott als vn-
 recht gethan nicht bekennen / Desselbi-
 gen nicht abgehen / vn̄ so vil vns müg-
 lich / vermittelst Göttlichem beystand
 nicht bessern / so werden wir warlich
 auch wie Sodoma vnd Gomorra da-
 hin gehen. Wiewol / gewis ist das / vnd
 man siehts gantz für augen / Es hilfft
 an der Welt kein dreyen noch warnen /
 Vnd ist dis (glaub ich) das allergröste
 wunder auff Erden / das man des men-
 schen hertze / des gar nicht bereden
 kan / das es vbel handeln solle / Wie
 sichs dann nimmermehr / zu einiger
 misshandlung willig vnd gern / von
 ihm selbs bekennet / vil mehr sich stetz
 aus angeborner art / Wie Adam dort
 erstlich that / da er seine erste vbertret-
 tung auff Euam leget / so fein zu schmü-
 cken / vnd wie ein Ketzelein zu butzen
 weis / das genugsam ist.

Ob wol die heylige schrift / des
 vns

vns klar vberzeuget / da Gott spricht /
 Prauum est cor hominis / Item / da der
 heylige Joannes saget / Mundus in
 maligno positus / das ist so vil / das in
 der Welt gantz vnd gar nichts guttes
 sey / Ja ob vns auch der Herr Chri-
 stus selbs alhie berichtet / das er nur
 derhalben komme / nicht zu den gerech-
 ten vnd gesunden / sondern zusuchen
 vnd selig zu machen die elenden Armen /
 zu helffen den vngerechten vnd Franck-
 en / Summa / zu dienen denen / vnd her-
 widder zu bringen die / so in sünden ver-
 loren waren. Als wolt er sprechen /
 Wenn die Menschen nicht böß / sünd-
 hafftig / lügenhafftig / mörder / mis-
 handler / vnkeusch / hurer / Ehebercher /
 schwelger / vngerechten / forteilhafftig /
 betrieglich / hinderlistig / wücherer / vnd
 das ichs mit einem wort beschliesse / Ob
 göttlich wehren / so hette ich nicht dörf-
 fen kommen. Noch hilfft es nicht /
 vnd kömpt vns dasselbige so hart an
 (Du lieber Gott) das wir nicht mehr
 thun

thun dörffen / dann nür bekennen vnd
darnach gnade bitten sollen / die wir
doch in der warheit nichts anders dan
vermaledeitte Wellebrende sein / vnd ge
wies kein gutter bissen an vns ist / zuvor
aus auch / weil Gott vnd der liebe Her
re Christus / vns selbs zugesagt hat /
vns dennoch nicht zuerstossen / Son
dern mitleyden vñ gedult mit vns zu ha
ben / Ja aller vnser sünde nymmermehr
zugedencken.

Es mus aber alles nichts sein / son
dern die verstockten Juden vnd heylo
sen Pharisier / benebē allen Gottlosen /
müssen also anlauffen / vnd den Her
ren Christum so hoch erzürnen / das er
auch noch die hand anlegen mus / vnd
mit der that auch euserlich seinen einer /
von Gottes wegen / vber die vnbusfert
gen sündler beweysen / das er / wie hie die
se Action beschlenst vnd ausweist / die
wechsler / Keuffer / vnd verkeuffer / so sei
nem Wort zuwidder / aus dem Tempel
Gottes gewaldiglich heraus treibet /
vnd

vnd also ihre Kremerey nicht lenger ge-
 dulden kan. Durch welche beyde ge-
 schicht nu/ vns wird angezeigt / vnd
 wir ermanet werden / das wir dem
 Zacheo gleichförmig/ in dem/ das wir
 in vnser gewissen schlahen/ vns erken-
 nen/ vnd den andern/ von hertzen feind
 werden müssen vnd sollen/ vnd nichts
 widder Gottes ehre fürnehmen/ welches
 er dann vngestraft nicht lassen wil.

Sonderlich aber sollen wir darauff
 mercken vnd das wissen / das vns in
 denselbigen obgenanten Wechsiern/
 nichts anders/ dann das Babstumb/
 sein fall vnd vndergang prefigurirt ist/
 Welches nach dem es nu für augen/
 das darzu kommen/ das es auch bey
 euch lieben Herren zu Leipzig/ gefallen
 vnd dahin gestürtzet ist / hab ich dersel-
 ben ursach halben / mit dieser meiner
 Action/ (euch zugeschrieben vnd dedi-
 cirt) als zu gratulirn mir furgenommē/
 weil man (Gott sey lob vnd danck) sol-
 cher händler des Babstumps / durch
 Gottes

Gottes verleyhen / aus seinem heyligen Tempel nu bey euch auch los ist.

Dedicire vud offerire also vnd hiermit / euch einem Erbarn Dochweisen Radt / vnd gantzer Stad Leipzig / diesen meinen bekarten / Gottseligen vnd frommen Zacheum / sintemal vil frommer / bekarten vnd Christlicher Zacheer / in ewer wolerbauwen / ehrlichen vnd weitberümpften Kauffstadt erfunden / die sich nu in alle ihrem thun vnd wesen / in allem handel vnd wandel / dem Wort Gottes mit freuden vntergeben / desselbige von hertze gerne / wie Zacheus den Herrn Christum auffgenommen haben / die auch demselbigen lieben Zacheo / gerne nachzufolgen fort hin gedenccken / das andere der Pharisser Volck / das ist des Babstes hauff in ewigkeit / vermittelst Göttlicher hülfe vnd gnaden / zufliehen vnd zuuermeiden / auch sich dafür zuhütten die zeit ihres lebens willens sein.

Solchs wünsche ich euch / vnd denselbigen

de
B
ga
hic
gel
ster
Je
dig
gu
ger
tig
ba
Le
stig
me
Ka
ste
lich
mit
sch
An
E.

denselbigen allen ewern einwonenden
 Bürgern / vnd yedermenniglich von
 gantzem hertzen / das der liebe Gott
 hierzu / seinen ewigen segen vnd gedeyen
 geben wölle / ein yedern frommen Chre-
 sten / in erkendnus seines lieben Sons
 Jesu Christi vnseres Deylandts / gne-
 diglich zuerhalten vnd an leib vnd seele /
 gut vnd ehre / barmhertziglich zu besel-
 gen / Amen. Mit angehengter demü-
 tigen vnd gantz fleissiger bitte / ein Er-
 bar Radt vnd die gantze gemeine Stad
 Leipzig / wölle solche meine arbeit gün-
 stiglich von mir vnd zu gefallen anneh-
 men / Womit ich sonst ein Erbar
 Rad vnd gemeiner Stad zudienen wü-
 ste / wil ich allzeit vngesperts fleis dienst-
 lich vnd willig erfunden werden / Dar-
 mit dem lieben Gott in seinen ewigen
 schütz beuolen. Datum Dessau 2c.

Anno 1546.

L. L. W.

Williger.

Joachimus Gress Schul-
 meyster zu Dessau.

B. Person

Personae.

Actor.

Jesus Christus.

Petrus.

Jacobus maior.

Ioannes.

Andreas.

Philippus.

Thomas.

Bartholomeus.

Mattheus.

Jacobus minor.

Judas Thaddaeus.

Simon.

Judas Ischariotes.

Duodecim A-
postoli Christi.

Joachim.

Anna.

Coniuges / adducen-
tes pueros ipsi Jesu /
ut imponat illis ma-
nus.

Princeps iuuenis diues.

Salome mater Zebedeorum.

Bartimeus cecus.

Primus

- Primus.
- Secundus.
- Tertius.
- Quartus.
- Quintus.
- Sextus.
- Septimus.
- Zacheus publicanus.
- Servus Zachei.

Turba populi cōsequen-
tis Christum / cum tran-
siret Jericho.

- Primus.
- Secundus.
- Tertius.
- Quartus.
- Quintus.
- Sextus.
- Septimus.

Scribe et Pharisei / illu-
denter Zacheum et mur-
murantes contra Chri-
stum / accusantes etiam
discipulos.

- Primus.
- Secundus.
- Tertius.
- Quartus.
- Quintus.
- Sextus.
- Septimus.
- Octavus.

Turba populi occurrens
Christo / acclamans
Bosianna filio David.

B ij Pri-



Primus.
Secundus.
Tertius.
Quartus.
Quintus.
Sextus.
Septimus.
Octavus.
Nonus.
Decimus.

} Nummularij.

Primus.
Secundus.
Tertius.
Quartus.
Quintus.

} Pueri in templo clamantes Wofiana filio David.

Caiphas.
Dannas.

} Principes Sacerdotū.

Don



Von den Personen ein vnterricht an die Actores.)

DOn den Personen zureden /
 Warumb ich der in so einer Klei-
 nen Action / so vil gebraucht
 hab / so es doch villeicht einan-
 der / mit wenigern hette künnen odder
 wollen ausrichten ? Solchs verant-
 wort ich also. Man sal einer yetzlichen
 Historien / so vil es ymmer möglich ist /
 ihr recht thun / So bringts der Text nu
 alhie mit / vnd der Euangelist Lucas /
 Zwar er alleine nicht / sondern zugleich
 alle beschreibens also vn̄ nicht anders /
 mit hellen ausgedruckten Worten / das
 Christus / da er nach Iherusalem gerey-
 set / sey ihm eine grosse menge Volcks
 nachgefolget / mit ihm durch Jericho
 gezogen / Welche dann alle bey vnd ne-
 ben dem miracel gewest / da er den blin-
 den Bartimeum sehende gemacht /
 Das ist eins.

Zum andern / so seins auch freylich
 B ij andere

da
fi-
u.
on



andere gewesen diese / so da haben gemürmet widder Christum / das er zu Zacheo vnd nicht zu ihrer einem vil mehr eingekeret hat. Item abermal andere gewesen / die aus der Stad Iherusalem heraus gelauffen ihm entgegen / dann sind sie aus der Stad herausgangen / so finds ia diese nicht / so mit ihm von Jericho kommen.

Zum dritten so müssen ia dis sonderlich andere sein / die Kremer vnd Wechsler / die er im Tempel findet / da er hieneinnen gehet / welchs dann Klerlich anzeyget / das sie für ihm drinnen gewesen sind.

Auff das ich nu der Historien (wie gesagt) ihr recht thette / so hab ich zu yderm geschicht / sonderliche Personen / vnd der nicht weniger / dann wie sie verzeichnet gebrauchet vnd gebrauchen wollen / Zuuoraus aber im letzten geschicht / da Christus die Kremerey den Hohenpriestern verstorret / hab ich dieselbige that Christi / ad nostra tempora accom-

accommodirt / Seittemal das austrei-
ben der Wechler / gewislich de nostris
et Papatus temporibus presagirt hat /
vnd noch / wie ich dann auch in der De-
dicatoria vermeldet / Derhalben sol
man solche Personas darzu haben /
wie sie die Keim describiren vnd ausweis-
sen / als nemlich Curtisanen / Anthoni
Pfaffen / Sanct Valins botten / Mün-
nich vnd Nonnen zc.

Zwar man mag wol das gantz
Geistlich geschwirm / Babst / Cardi-
nel / Bischoff / mit allem beschornen
Doffgesinde / an stad der Verkeuffer
vnd Wechler einfüren / Da dann der ei-
ne ein sprengkessel / der andere ein Keuch-
fas / der Dritte etwas anders in henden
haben sal / alles solche Instrument /
Nemlich die zu ihrem Wandtwerck /
zu ihrem Babstum vñ Götzen dienst
dienen vnd gehörig / So vil hab ich
reden wollen / von den Personen / vnd
dasselbige zu meiner entschuldigung /
vieler gedancken vnd rede zuvor zukom-
men zc.

B iij Was

Was aber sonst die Action antrifft /
 sonderlich die / das ich (wie gemeldet)
 die Betsler / vnter den Wechslern ver=
 standen haben wil / Das sal vnd kan
 mir niemand taddeln / Dañ es ist gantz
 recht / vnd wir werdens (wils Gott)
 besser sehen an ihenem tage / das so sie
 sich nicht bekeren / werden sie gewis die
 sein / die aus Gottes Reich gestossen vñ
 darein nicht gehören / Das ichs aber
 nicht anders dann dermassen zustellen
 mir fürgenommen / hat mir vrsach dar
 zu gegeben / der / so die Action vom Zus=
 trentten Concilio gemacht hat / Da sie
 dann der Engel Gabriel / vber hals
 vnd kopff gleicher weise vom Himmel
 weg pellirt.

Möcht aber etwan ein schwach=
 gleübiger / guthertziger Christ sprechen
 man solt ihrer dennoch nicht so spot=
 ten / vil mehr vermanen / ob sie noch
 möchten bekert werden? Antwort / Es
 ist bey den heylosen / Gottlosen Baals
 Pfaffen (sonderlich ja bey den meisten)
 keine

Keine besserung / dann sie von ihrer Teuf
 flischen / Gotteslesterlichen / allerergsten
 vnd greulichsten Meskremercy / ab=
 zustehen nicht gedencken / Hören nicht
 auff Gottes Wort zu lestern / mit ihrem
 Abblashandel (welchen dann die Co=
 uanienses newlich zu renouirn furge=
 nommen / geschweig das sie ihn solten
 liegen lassen) Summa es ist den Pa=
 pisten noch nie eins ins hertz kommen /
 widder im grösten noch im kleinsten
 sich zu bessern / Darumb sein sies wol
 wert / das man vberal vnd allezeit / wie
 vnd wu man nur kan / ihres gauckel=
 wercks vnd Götzendienstis widderumb
 spotte.

Ja die es zu thun haben / vnd dem
 es beuohlen ist / Die sein es schuldig /
 das sie nach Christi exempel / solche Ab=
 götterey verbitten / verstören / vmbkeren
 vnd gantz vñ gar aus der Christlichen
 Kirchen vertreiben vnd nicht leyden.
 Welche so sie es wissen vnd nicht thun /
 Sondern gehen vnd geschehen lassen /
 B v verhengern

verhängen vnd gedulden / versündigen
 sie sich an Gott nur hoch vnd sehr /
 darfur sie auch gar grosse rechenschaft
 geben müssen / Seittemal Abgötterey
 vnd vngheorsam die allergrösten sün=
 den sint / die er am vbelsten leyden kan.
 Es wölle vns aber derselbige liebe Got
 vns (sag ich) die wir seinen willen wis=
 sen / sein Götliche gnade auch gne=
 diglich darzu verleyhen / den=
 selbigen seliglich zuuoln=
 bringen / zu thun zu las=
 sen was recht ist /
 Amen.

(*)

Vorrede



Vorrede.

A C T O R.

W Ir bringen abermals alhie
 Ein neues Spil vnd Histori/
 Zwar ein Histori nicht allein
 Bsondern derselbigen vil sein/
 Aus zweyen Capiteln zusam
 Wolt ihr gern wissen ihren nam/
 Das achtzend vnd neunzehnd vorwar
 Aussm Euangeli Luce dar/
 Darinnen schöne geschicht sein
 Wie ihr sie solt sehen allgmein/
 Die vns lehren ganz seuberlich
 Von Gottes vnd seins Christi reich/
 Von seinem Ampt so wunnigleich
 Welchs doch nur geistlich/ versteht mich
 Durchs Wort Gottes vnd Geist erkant
 In leyden/sterben/schmach vnd schand/
 Verborgten ist/dardurch man doch
 Auch widder kumpt zu ehren hoch/
 Ja zu der ewign seligkeit
 Von dem Reich solt ihr hören heüt/
 Welchs ist in vergebung der sünd
 Vnd wie man bey Gott friede sint.

Gott

Gott hat von Himmel seinen Sohn
 Gesand aus seinem obersten Thron/
 Durch angenommene menscheit blos
 Durch leyden/pein/auch armut gros/
 Dem Menschen kommen zu seinem trost
 Da er ihn von der sünd erlost/
 Ihm nur das allerbest gethan
 Darfur er must zu lohn entpfahn/
 Den bitteren Tod ans Creuzes stam
 Wehm solte nicht/Bit euch allsam/
 Sein herze von freuden springen 2
 So er hört von solchen dingen 2
 Das vns zu gut geschehen sey
 Fur vnser sünd so mancherley/
 Wie Christus dieselb vnser sünd
 Ausgtilge/vns gholffen/stet gedient/
 Wehr wolt des nicht sein allzeit fro 2
 Vnd singen stet Alleluia 2

Verloren wahrn all Menschen kind
 Dieselbn herwidder gebracht sind/
 Durch Christum/wie er allhie spricht
 Er sey kommen zu anders nicht/
 Dann nur zu suchen mit gnaden
 Vnd zu heylen vnsern schaden/

Selig

Selig zu machn das verlorn ist
 Hatts auch gethan der liebe Christ/
 Vnd thuts noch teglich fort vnd fort
 Wie vns leret sein werdes Wort/
 Das er suchet/ sonderlich die
 So ihre sünd erkennen hie/
 Zu ihm kommen bitten genad
 Odder die auch sunsten verstad/
 Von andern zu ihm werden gfüre
 Geleit/ getragen/ Wo er spürt/
 Ein rechten glaubn/ Bald ist er da
 Mit seiner Göttlichn gnad gar nah/
 Er tröst/ er hilfft/ er rüfft/ er sücht
 Er lest gar keinen von sich nicht/
 Dem er nicht solde freundlich sein
 Summa/ die heilige Schrift gemein/
 Red von anders nichts dann von dem
 Wie er sich der sündler annem/
 Doch solcher sündler/ Die bus thun
 Die sich dafür erkennen schon.

Die andern (sie sind zweyerley)
 Dieselbigen/ merckt wie ihm sey/
 Strafft er hart/ Ja söch sie nicht an
 Hat wol er mit der faust drein gschlan/

Wie

Wie er den allhie yetz auch thut
Weil sie seine warnung so gut/
Die zeit ihrer heimsuchung dort
So verachteten/ vnd sein Wort/
Gar mit nichten glauben wolden
So draut er ihn/ das sie solden/
Gar ausgerottet werden all
Dergleichen es ergehen sal/
Allen Gottlosen auff erden
Die Juden des innen werden/
Vnd habens lang befunden zwar
Vns ist's nu auch zur warnung klar/
Geschrieben/ das wir gdencken dran
Vnd diesen König nicht ausschlan/
Ihn küßn vil mehr vnd annehmen
Vnd vns seins Reichs gar nicht schemem/
Nuch nicht dran ergern vmb ein har
Dann es ist Gottes willen gar/
Das dis Reich/ vnser Königs Reich
Den andern sol sein gang vngleich/
Durch schwachheit dis stet stercker wirt
Vñ solchs der Geist durchs wort gebird/
Also/ das ob wir sinder sein
Im Tod verloren allgemein/
On alle kreffte vnd stercke/ schwach
So wil vns vnser König doch/

Welcher

Welcher der Herr Sebaoth
 Er wil vns ia in aller not/
 So wirs vns nur zu ihm versehn
 Stercken/trösten vnd gwies beystehn.
 Das glimmend tocht/das lescht er nicht
 Dergleichen auch nicht gar zubricht/
 Das zustossen rohr / Nein er zwar
 Er hat mit vns gedult vorwar/
 So nur der glaub bestendig bleibt
 Nimpt er vns an zu aller zeit/
 Schlegt niemands aus / jung vnd ale
 Arm odder Reich / Solds sehen bald/
 Die Kleinen Kindlein segnet er
 Halff dem blinden der güttig Herr/
 Den er am wege betteln fand
 Zacheus auch sein gut erkandt/
 Ob er wol wahr ein sündler gros
 Doch zelt er ihn / derselben los/
 Weil er eins rechten glaubens war
 Vnd so thut er ein ydern zwar/
 On denen / so misbrauchn sein gut
 Den die Welt bas gefallen thut/
 Als da ist der Jünglinge hie
 Vnd die Schrifftglertten / Welche nie/
 Seiner trewen warnung wahr gnommen
 Drumb auch die straff vber sie kommn
 Das sie

Das sie verstoßen sint dahin
 Sie wolten stracks nicht leyden ihn/
 Das er vber sie solt regirn
 Kündē doch solchs nicht hienaus fuhrn/
 Dann ob sie Christum tödten drob
 Doch stund er widder aus dem grab/
 Vnd nam sein Reich mit gewalt ein
 Die last vns zu ein warnung sein/
 Das wir vns vnter ihn ergeben
 Nach sein Wort ihm zugfallen lebē/
 Thun wirs mit gut/wol vns als dann
 Wu nicht? So wirdts vns gleich so gan/
 Wie den Jüden/nicht anders zwar
 Vnd man weis vns kein danck vorwar/
 Vil mehr würde die ewig pein
 Unser wolverdienter lohn sein/
 Darfür vns Gott bewaren wol
 Ein yderman thu was er sol/
 Darmit wir Gottes huld vnd gunst
 Erlangen vnd nicht lauffn vmb sunst.
 Die Action wirt selber sich
 Besser erklären sicherlich/
 Im agiren/dann wir yetz han
 Nichts sonderlichs gezeiget an/
 Die nützlichsts lahr aber wirt sein
 Gar hin zum allerletzten sein/

Die

Die wöllen wir auch sparen so
 Applicirn im Epilogo/
 Jezt aber schweige/hört Christo zu
 Der wird yezund anheben nu.

¶ ACTVS PRIMVS.)

IESVS CHRISTVS.

Redet zu seinen Zweiff Jüngern.

Wolan mein lieben Jünger schon
 Ich hab das mein nu schir gethan/
 Wird mit mir anders werden schir
 Bin noch ein Klein zeit bey euch hier/
 Ihr habt von mir das Gottes Wort
 Nu schir bey vierdhalb Jarn gehört/
 Den willen meines Vaters zart
 Derhalben ich dann gesand ward/
 In dies elende Welt herein
 Das ich sold ihr Prediger sein/
 Solches wolde mein Vatter han
 Das ich der Welt solt predign schon/
 Vom Reich Gottes vnd anders nicht
 Auch von seinem strengen gericht/
 Darmit er straffet die sündler
 So bit ich nu yezunder/
 Ihr wöllet ia bey leibe nicht
 Meines Worts vergessen mit iche/
 C Mein

Klein trewe warnung nehmen an
 Die ich euch gar offten gethan/
 Das ihr der gleubet festiglich
 Es wert alles so finden sich/
 Wie ich euch hab gesaget er
 Es kumpt ein trübs wetter daher/
 Ober das Jüdische Volck / Ach
 Ihr aber wolt ihr han gut gmach/
 Vnd bstendig bleiben in der not
 So rad ich euch folgt mein gebot/
 Wie vnd was ich euch hab gelehrt
 Nemlich bett vñ gleubts / jr seidts gwert
 Das ihr gewis diesem vnfall
 Entkommen sollet allzumal.

Ihr solt ewer gröst anfechtung
 Ewer hefftigste verfolgung/
 Durchs gbettes krafft uerwinden
 Ja es werdn euch all ewr sünden/
 Durchs gbet vnd den glauben vergebre
 Vnd des habt ihr zwey gleichnus ebn/
 Zwey schöne gleichnus von mir ghort
 Dencket nur an dieselben wort/
 Das erst vom Richter vnd der Widwen
 Welchs vns lehret allzeit beten/
 Das man nit las werde darinn
 Dann Gott wil stet gebeten sein/

Das

Das ander aber zeyget an
 Vnd gibt die form / wie man sol thun /
 Nicht wie der Pharisceer that
 Sonder wie der arm Zolner bat /
 Der all sein thun auff gnad gestalt
 Wie ichs euch nach der leng erzelet /
 Doch widderzuholen vnnöttig
 Seht nür das ewer glaub thettig /
 Sein wacker sey vnd vnuerzagt
 So habt ihr keinnot wie ich gsagt /
 Halt euch ans Wort vnd glaubet dem
 So seid ihr bey Gótt angenehm /
 Vnd in der Welt wol sicher zwar
 Für aller not angst vnd gefahr.

Wie siehet Christus die
 Leute mit Kindern zu ihm kommen /
 redet derhalben Petrum vnd Joannem an wie
 folget / Vnd man sol hie dis mercken / das man etzo
 lich mehr Menner vnd Weiber (mutas perso-
 nas) mit Kindern / der Action zu gut haben
 sol / Dann one Zweifel / ist ein
 par Volcks allein nicht gewest /
 Diese aber Anna vnd Joach
 im reden von der and
 dern aller wegen.

E ij Was

Das

Was kommen aber da für Leut:
 Peter / sie wincken vns / gib bscheid /
 Johannes geh mit ihm zu ihm
 Wir wölln dieweil hie bleiben stehn.

ANNA MATER.

Ach lieben freunde bit den Herrn
 Wir wolten ihn ansprechen gern /
 Das er vns vnser Kinderlein
 Solt anrüren vnd segnen fein.

PETRVS.

Was Kinder anrüren? Hör doch
 Sol er nu erst auch werden noch /
 Ein Kinder Magd? Ich sag vorwar
 Hebt euch weg mit den Kindern dar.

¶ Nu saget ers Christo.

Hör lieber Meyster las dir sagn
 Sie wölln die Kinder zu dir tragn /
 Ich weis nicht was du ihn thun solt
 Aber ich sie nicht lassen wolt.

IOHANNES.

Ich woltsn traü auch selbs nicht gsten
 Solstu erst mit Kindern vmb gehn?
 Wir thetten sie zu haus weissen.

Jesus

37
IESVS CHRISTVS.

Wehr hat euch aber das gheissen /
Des müst ihr haben Kleinen frommen
Last die Kinderlein zu mir Kommen /
Vnd wehret ihn nicht / Ich sag euch
Solcher ist das Himmelreich /

Nu redet er die Eldern
selbs an / so die Kinder gebracht ha-
ben / nimpt die Kindlein auff den arm /
hertzet sie vnd segnet sie.

Kompt her Kompt her lieben Leutlein
Last euch nicht schreckn die jünger mein /
Bringt mir die lieben Kinder her
Sie seint mir lieb von hertzen sehr /
Warlich sag ich euch das wol an
Wers Reich Gottes nicht wirt entpfahn
Eben gleich wie die Kinderlein
Derselbig wirt nicht Kommen nein.

IOACHIM PATER.

Des dancken wir dem lieben Gott
Der vns so reichlich getröst hat /
Durch dich Meister vnd durch dein wort
Welchs wir von dir yetz habn gehort /

E iij Hab

Hab danck du lieber Meister fein
 Von wegen vnser Kinderlein/
 Auch von vnser selbs wegn darnebn
 Gott der Herr wol dirs lohn drum gebn.

PRINCEPS IUVENIS DIVES.

¶ Fellet Christo zu fus vnd redet ihn an.

Wolan so wil ichs auch wagen
 Gutter Meister las dir sagen/
 Dieweil du denn so freundlich bist
 Vnd die Kindlein zu dieser frist/
 Hast angenohmen herzlich gern
 Sie auch gesegnet in dem Herrn/
 Darüber auch das Himmelreich
 Ihn zugesprochen ewigleich/
 Lieber Meister so sag mir nun
 Was meinstu wol/das ich mus thun?
 Das ich ererb das ewig lebn
 Wollest mir des vnderricht gebn.

IESVS CHRISTVS.

Was heiffestu mich gut? Sag an
 Ich weis wol wie ichs sol verstan/
 Du meinests aber also nicht
 Wolan merck auff mein vnderrichte/
 Niemand

Niemand ist gut / den allein Gott
 Du weist vnd kanst ia die gebot:
 Nemlich / Du solt nicht ehebrechen
 Solt nicht Töden vnd dich rechen /
 Du solt nicht stelen gelt noch gut
 Vnd auch dein zung halten in hut /
 Das du kein falscher zeuge seist
 Vnd dein Eldern ihr ehr beweist.

DIVES.

Das hab ich alles auff ein hauff
 Gehalten von meiner jugent auff.

IESVS CHRISTVS.

Es feilt dir so ichs sagen sal
 Noch eins / vnd die andern allzmall /
 Wol die so dus zu herten fast
 Verkeuffe alles was du hast /
 Die armen thu darmit begabt
 So wirst ein schatz im Himmel habn /
 Vnd komme den / vnd folg mir nach.

DIVES.

¶ Da er das höret / Erawet er sich im
 Kopffe / vnd gebet darvon.
 Meister das ist ein schwere sach.

IESVS CHRISTVS.

C iij

Redet

¶ Redet zu seinen Jüngern wie
der weg gehet.

Das wußt ich wol / Es würd so gehn
O wie gar schwerlich wirds gescheh /
Das reiche Leut ins Himmelreich
Kommen sollen / Ich sage euch /
Es ist leichter / Das ein Kamel
Gehe durch ein nadel ohr schnell /
Dann das ein Reicher solle Kommen
Ins reich Gottes / habt ihrs vernommen

PETRVS.

Wehr kan dann selig werden auch :

IESVS CHRISTVS.

Ihr wisset nicht den rechten brauch /
Bey den Menschen ist vnmöglich
Aber nicht bey Gott / höret mich /
Den all ding sind möglich bey Gott
Es hat derhalb bey ihm kein not.

PETRVS.

Wolan so hör ich das noch gern
Das wir die sind gefolgt so fern /
Du weist es lieber Meister mein
Das wir die lieben jünger dein /
Alles verlassen omb deins willn.

IESVS CHRISTVS.

Schweigt.

Schweigt vñ hört ich wil euch fein stilln
 Warlich ich sag euch / Niemandt ist
 Der / so er wür sein haus verlest /
 Odder Bruder / odder Schwester
 Odder Vater / odder mutter /
 Weib / Kind / ecker vnd alles gut
 So er solchs vmb meint willen thut /
 Vnd vons Euangelij wegn
 Das er es nicht solde dargegn /
 Hundertfeldig widder entpfahn
 Auch yetz in dieser zeit wolan /
 In dieser vergencklichen Welt
 Ich wil euch sagen wie sichs helt /
 Es mus vnd wil verfolgung sein
 Doch sollen alle Christen fein /
 Diesen trost widderumb wissen
 Das sie gar nichts dran verliessen /
 Vnd ob sie alles dran setzen
 So kan sie einer ergetzen /
 Das ist mein lieber Vater schon
 Gar hoch dort drobn ins Himmels thron /
 Der ihn einmal widder wirt gebn
 Fur dis zeitlich das ewig lebn /
 Vnd doch auch hie gnug haben solln
 Sie kommen hin gleich wu sie wolln /

C v So

So sollen sie finden vorwar
 Heuser / vnd der genugsam zwar /
 Brüder / Schwester / Mutter / vnd
 Kinder / Auch ecker zaller stund.

Zwar dünckt mich nu im sinne mein
 Ihr solt ia so vergnüget sein /
 Es ist aber nichts / Ich merck's wol
 Hetten wir yetz den beuttel vol /
 Das thet sein ding / So gdenckt ihr nür
 Nur auff das vergenckliche hier /
 Auff weltlich thun / auff gutte tag
 Aber ich euch vil anders sag.

Schet / Wir gehn mit gsamptem hauff
 Wol gen Jerusalen hienauff /
 Es wird volendet alles nu
 Das do geschrieben ist / Hört zu /
 Durch die Propheten allzugleich
 Von des Menschen Son seuberleich /
 Dann er wird vberantwort werdn
 Den Heyden vnd sündern auff erdn /
 Er wird verspot / geschmecht / verspeit
 Auch gegeißelt mit widderstreit /
 Vnd von ihn getödtet endlich
 Aber am dritten tag merckt mich /

Wird

Wird er widder herfürer gehn
 Von den Todten widder auffstehn/
 Saget mir / Was halt ihr darvon?
 Es sol euch auch wol nicht eingan/
 Das macht das ihr gar nichts versteht
 Es ist euch ein verborgne red/
 Mit der zeit werd ihrs vernehmen
 Vnd euch derselbn gar nicht schein
 Noch auch daran nichts ergern zwar
 Ihr wert drumb zusezn haut vnd har/
 Ob ihrs yetz langsam gleuben künd
 So kumpt hernacher doch die stund
 Das die letzten die ersten sein
 Vnd die ersten die letzten fein.

IACOBVS MAIOR.

Johannes lieber Bruder mein
 Sich do kumpt vnser Mutter fein.

IESVS CHRISTVS.

Was wiltu liebe Salome?

SALOME.

Ach Herr Meister ich bitlich fleh/
 Las dise zwene Söne mein
 Welche auch sein die Vettern dein/
 Las sie sitzen in deinem Reich
 Einen zur rechten seuberleich/

Vnd

Vnd den andern zur lincken dort
Ich bit gib mir ein gut antwort.

IESVS. CHRISTVS.

Ihr wiest nicht was ihr bittet / Mein
Sagt mir aber beyde gemein /
Künd ihr auch trincken den Kelch wolan
Den ich trincken werde ? Sagt an /
Vnd künd ihr euch auch Teuffen lassen
Mit der Tauffe in aller massen /
Darmit vnd wie ich getaufft wert ?

IOHANNES.

Ja wol / yeder solchs hertzlich bgerd.

IESVS CHRISTVS.

Meinen Kelch solt ihr trincken zwar
Dergleichen mit der Tauffe dar /
Darmit ich wert getaufft schir
Solt auch getaufft werden ihr /
Aber das ich euch solt geben
Was vnd wie ihrs begert eben /
Zu sitzen zur rechten vnd lincken
Das hat gar sehr ein gros bedencken /
Liebe Salome das merck du
Dann es stehet mir ia nicht zu /
Sondern denen es ist bereit
Von mein Vater in ewigkeit.

Jacobus



IACOBVS MINOR.

¶ Redet zu Johanne vnd Jacobo maiore.
 Ja man wirt euch feygen Kochen
 Vnd bald ein sonderlichs machen/
 Bin ihm so nah verwand als du

IESVS CHRISTVS.

¶ Redet zu den Jüngern.

Schweigt alle still vnd hört mir zu/
 Ihr wisset das/vnd ist auch wahr
 Die weltlichn Fürsten herschen dar/
 Die Oberhern haben gewalt
 Mit euch hatts ein ander gestalt/
 Es sal vnder euch nicht so sein
 Sondern hört/Wil euch lehren fein/
 So yemand vnder euch sein wil
 Gewaldig lest sich düncken vil/
 Der sey ewer diener allzumal
 Das wisset nu vnd merckets all/
 Vnd wehr der fürnembste wil sein
 Sey ewer Knecht allergemein/
 Den auch des Menschen Son vorwar
 Ist nicht kommen/Nein er zwar/
 Das er ihm dienen lasse/O nein
 Besonder das er diene fein/

Vnd

Vnd das er gebe sein leben
 Zur erlösung fur vil eben /
 So sals sein / vnd so mus zugehn
 Ihr müst nicht auff solche ding sehn /
 Sind fleischliche gedanken dis
 Seid alle vngerecht gewis /
 Schlagts auserwerm sin zugleich
 Vnd folgt mir alle seuberleich.

BARTIMEVS CECVS.

¶ Sitzet am wege vnd bittelt.
 Ach gebt ein armen blinden man
 Der gar kein stück nicht sehen kan /
 Ich bitt durch Gott / Ach saget mir
 Was ist verhanden doch allhier /
 Das ein solche gereusch da ist :

EX CONSEQVENTIIS
 CHRISTVM.

PRIMVS.

Vorwar ein blinder ieck du bist /
 Was ists den mehr wenn dus gleich weis
 Wehr allhie sey vnd wie er heist /
 Jesus von Nazareth ist da
 Hastus nu vernohmen so :

BARTIMEVS.

Von dem man hab ich lang gehort
 Alles guttes an manchem ort.

Jesus

Jesu du lieber Meister feins
Du Son David erbarm dich mein.

SECUNDVS.

Ey halt das maul du blinder tropff
Ich schlag dich anders auff dein kopff/
Meinstu petler / das er dich hör
Er hat freylich zuschicken mehr.

BARTIMEVS.

Du Son David erbarm dich mein

TERTIVS.

Ich hald der blind wire thöricht sein.

IESVS CHRISTVS.

Bringt doch den armen menschen her
Vnd last vns hören sein beger.

QVARTVS.

Steh auff / sey frölich / Er rufft dir
Kom balde / reich her die hand mir.

IESVS CHRISTVS.

Was wilen das ich dir thun sol ?

BARTIMEVS.

Rabboni freilich du sichsts wol /
Ein armer blinder man / bin ich
Das ich sehen müg / bit ich dich.

IESVS CHRISTVS.

Geh hin / dein glaub hat gholffen dir.

Bartis

weist

Jesu

BARTIMEVS.

Gott sey gelobt ins Himmels zihr/
 Gott sey gedanckt in ewigkeit
 Der mir wider mein gesundheit/
 Durch diesen Meister lobesam
 Durch vnsern wahren Messiam/
 Mein glicht so gnedig widdergeben
 Er sal vns auch das ewig lebn/
 Nach dieser Welt geben einmal
 Dis zeug ich von ihm wu ich sol/
 Sein Junger wil ich auch nu sein
 Wol durch das ganze leben mein.

QVINTVS.

Ly wehr wolt doch Gott loben nicht
 Ueber diesem grossen geschicht ?

SEXTVS.

Gott sey gelobet ewiglich
 Dergleichen hab nie gsehen ich.

SEPTIMVS.

Es ist lobens vnd danckens wert
 Das Gott vns arm Menschen auff erd/
 So gnediglich ansehen thut
 Der vns gesand den Meister gut
 Zu helfen vns an leib vnd sehl
 Er kan heylen all vnser feil.

¶ Actus

ACTVS SECVNDVS.)

ZACHEVS PVBLICANVS:

Wie nimpt mich das so wunder sehr
 Wu doch mein knecht bleibt ymmermehr
 Ich hab ihn ausgeschickt zu handt
 Vnd nur allein fürs Thor gesandt
 Solt nicht mehr den in garten gehn
 Da wird er aber etwan stehn/
 Wird maulaffen feil haben gwis
 Das gfindt thut ein solchen verdries/
 Es ist doch vber alle mas
 Wie man sich yetz on vnderlas/
 Mit allem gesinde mus treibn
 Wu mag er ymmermehr bleiben?
 Ich wolt langst widderkommen sein.

¶ Nu kumpt er.

Sich nu dort kumpt er gtretten fein/
 Mit seiner gsellen einem nu
 Mich dünckts wol/wird so gehen zu/

¶ Nu redet er zum Knecht.

Ich mein kanst widderkommen bald?

SERVVS ZACHEI.

Ach Herre das deiner Gott wald/
 Ich biet fleissig verzey mir das
 Ich kam dortte so fein zu mas!

D.

Zu einer

Zu einer gschicht so wunderlich
 Dergleich fur nie hab gsehen ich/
 Ein gros wunderwerck hab ich gsehn
 Ich kund noch mocht nicht daruō gehn/
 Ja Herr /weis das gwis vnd vorwar
 Vnd werst auch selbs gewesen dar/
 Hests nicht vnderwegen gelan
 Werst gstanden vnd hests gsehen an.

ZACHEVS.

Weil dirs gfelt mus was köstlichs seit.

SERVVS.

O allerliebster Herre mein/
 Wenn du nur wüsstest was es wehr
 Ich weis du würdest dichs wundern sehr.

ZACHEVS.

Wehr köndts erdencken wehrs nicht so:
 Vnrüz hastu gewaschen do/
 Mit deinem gjellen / der mit dir
 Daher kam gangen / Sage mir /
 Wie stets vmb all des Reichs sachen:

SERVVS.

Wolan was sol ich draus machen:
 Du scherzt nach deinem alten brauch

ZACHEVS.

So sags doch her / so weis ichs auch

Iste

Ists gut vnd wahr / so hör ichs gern
 Wirdstu aber etwan fidern /
 Vnd listiglich betriegen mich
 Vorwar vorwar so schlag ich dich.

S E R V V S.

Ach Herr ich weis du schlegst mich nicht
 Hör doch ein wunderlich geschicht /
 Du kennest ia den Meister dort
 Auffss wenigst hastu von ihm ghort /
 Ich mein den dort zu Nazareth
 Jesum / welcher ist ein Prophet.

Z A C H E V S.

Ich ken ihn nicht / Was hat er gthan
 Er sol ia sein ein frommer Man.

S E R V V S.

Das hat er zwar beweisen da
 Wie ich bin kommen hin gar nah /
 Hart bey vnsern garten / merck mich
 Daselben an der eck gewislich /
 Geschach dis geschicht das ich dir sag
 Ein Betler sas mit grosser klag /
 Derselb war blind / vñ bat durch Gott /
 Ihm zu helfen in seiner not /
 Tu hat sichs gleich begeben so
 Das dieser Meister Jesus do /

D ij Gleich

Gleich denselben weg daher kam
 Mit seinen Jüngern allensam/
 Vnd auch ein grosses Volck mit ihm
 Da das der Bettler hort / vernim/
 Des Volckes reden vnd gemür
 Fraget er so / Was laufft hie für ?
 Es wurd ihm gsaget wehr es wehr
 Da sieng er an zu ruffen sehr/
 Er rieß vnd sprach / O Jesu fein
 Du Son David erbarm dich mein/
 Das volck nu / das forne an gieng
 Da es von ihm hort solche ding/
 Schalde ihn / das er schweigen solt
 Welches er doch gar nicht thun wolt/
 Ja er hub an vil mehr zu schreyen
 Du Son David erbarm dich mein/
 Wie ich nu solch geschrey gehört
 Da wolt ich traun nicht gehen fort/
 Ich gdacht / must fur sehn wus naus wil
 Der Meister der stunde da stil/
 Hies ihn zu sich führen daher
 Wie sie ihn nu brachten zum Meister/
 Fragt er vnd sprach / Wie meinstu wol
 Was wiltu das ich dir thun sol?
 Der Blinde sprach / Herr / das ich nür
 Sehen müge / darzu hilff mir.

Zacheus.

ZACHEVS.

Halff er ihm den : Lieber war mit :

SERVVS.

Herre ich kan dirs sagen nit/
 Er halff ihm ia vnd das ist war
 Nicht mehr dan durch einwörtlein zwar
 Er sprach/Sey sehend/trau du mir
 Dein glaube hat geholffen dir.

ZACHEVS.

Vnd er ward sehend von stund an :

SERVVS.

Das ich nicht anders sagen kan/
 Er folgt ihm ia noch also drat
 Lobete vnd preisete Gott/
 Dergleichen alles Volck zu gleich
 Lobete Gott im Himmelreich/
 Für solche wolthat/anders nicht
 Tu wolte ich für dis geschicht
 Nicht vil geldes nehmen wolan
 Nur das ich darvon sagen kan/
 Diweil ich sichtlich hab gesehn
 Ihn mittm Meister wandeln vnd gehn
 Verhoff auch drumb zu dir mein Her
 Werdts nu nicht mehr drum zürnen
 Das ich bin was lang aus gewe

D ij

ZACHEVS.

Schweig still / vnd thu forthin das best /
 Ich scheld dich nicht / hast recht gethan
 Wolt Gott ich kennet auch den man /
 Das ich zum ersten zornig war
 Gedacht ich / wehrst etwan gewesen dar /
 An einem andern ort / merck mich
 Nu entschuldig ich selber dich.

SERVVS.

Des hab ymmer danck Herre mein
 Das du aber den Meister fein /
 Begerst zu sehen / Merck mich so
 Kan dir wol widderfahren do /
 Wird yetz (glaub ich) durch die stad gehn
 So kanstu ihn ia fein wol sehn.

ZACHEVS.

Wolan ich denck wie ich ihm thu
 Geh du aber zu hause nu /
 art deiner arbeit wie du weist
 frommē Knecht man nicht vil heist.

Nu redet Zacheus bey sich
 selbs alleine.

r Gott in deinem thron
 ch doch von diesem man /

Vom

Vom lieben Meister Jesu fein
 So vil gehalten im hertzen mein/
 Nach dem ich vil von ihm gehört
 Hat mir aber noch nie gebürt/
 Das ich ihn hette mügen sehn
 O Gott wens diesen tag möcht gsehen/
 Weis nicht wie mir yetz ist zu sin
 Ich weis auch schir nicht wu ich bin/
 Freud/angst/zugleich mich vberfeld
 Weil mir mein Knecht hat hergezelt/
 Das gschicht das er gesehen hat
 Ein gros mechtige wunderthat/
 Wiewol ihene vom Lazaro/
 Mich zuuergleichn mit dieser do/
 Dann ihene noch vil grösser ist
 Drumb liegen mir zu aller frist/
 Sein gutter nam vnd thaten gros
 In meinem sin vber all mas/
 Das weil ich merck sein freundtlickeit
 Gen yederman zu aller zeit
 Allermeist aber seine macht
 So dyncfet mich/hab bey mir bdacht/
 Mus etwas grössers in ihm sein
 Ist nicht ein schlechter mensch allein
 Göttliche krafft verborgen ist
 In ihm/gleub ich zu aller frist/

D iij

Liii

Ein blinden sehende machen
 Todten auffweckn/ sindt gros sachen/
 Helffen an leib vnd sehl darzu
 Wehr mir nöttig/ Gott das weistu/
 Ja zwar du weists am bestn mein Gott
 In wasser gfar vnd grosser not/
 Mit welchen sünden ich bedrangst
 Wie mir in mein hertzen so angst/
 Ist worden/ Auch nur diese stund
 Wehr hilfft mir das ich werd gesund:

Dis hett ich zwar beschloffen so
 So ich diesen Meister aldo/
 Erstlich nicht mehr dann sehen solt
 Vnd so mir glück hernach wol wolt/
 Das ich seins Radts gebrauchen künd
 Was doch meinem stande zustünd/
 So er mich dis berichten thet
 Vorwar ich dann gwunnen spil het/
 Ach ach ich fühl wol was ich fühl
 Ich hab ihm ia gethan zu vil/
 Ich hab bisher glebt so schendlich
 Ach lieber Gott nu'rewets mich/
 Wie hab ich doch die armen leut
 Ober setzet zu aller zeit/

Wie

Wie hab ich sie gtrieben / gschunden
 Vnderdruckt zu allen stunden /
 Ich bin ein grosser Wucherer
 Ich bit vergib mirs lieber Herr /
 Ich bin doch gar ein bösewicht
 Heyloser dieb vnd anders nicht /
 Ich bins auff diese stunde noch
 Aber Herre Gott / Ich wil doch /
 Nicht darumb verzweiffeln gar
 Wil aber from werden vorwar
 Es ist mir leid ach Herre Gott
 Es sol vorwar dis Meisters radt /
 Des lieben Meisters Jesu lahr
 Gewislich darzu helffen sehr /
 Das ich von diesem wesen las
 Vnd forthin lebe dester bas.

Möcht einer aber sagen so
 Er solt deiner sein mechtig fro /
 Wenn er solche puben begert
 Wie du bist / der wirt er gewerd /
 Glaub wol durch aus in aller Welt
 Was hilffe dich nu dein grosses gelt ?
 Das du erschunden vnd gstolen hast
 Darffst nicht kommen zu ihm zu gast /
 Nach solchen leutten sehnt er sich nicht.

D v Hie

¶ Die besinnet sich Zacheus / schweigt
ein wenig vnd redet darnach ferner.

Was taug ein ding den vnuersücht :

Ja spricht ein ander abermal
Kumpstu für ihn michs wundern sol/
Wehr dich huckete du pusil
Bist kaum so gros als eine grill/
Nu / Ich denck wie ich dem auch thu
Ich wil yezund von stundan nu /
Ihm entgegen lauffen dahin
Da er dann yezund wirt fürgehn/
Ich weis ein Maulberbaum gar fein
Sol mir darzu behülfflich sein /
Da wil ich steygen hienauffen
Wil ihn ia sehen im hauffen/
Nur zu sehen ich ihn beger
So es den wird etwas besser
Das ich ihn auch anreden kan
Ach lieber Gott / was feilt mir dan :
Was het ich dann für grosse not
Nur ein einig Predig Herr Gott /
Ja ein einigs wörtlein allein
Das solt nur volle gnüge sein/
Wolan / man sagt von ihm so vil
Darauff ichs auch nu wagen wil/
Glück

Glück zu / das Gott der Herre walt
 Ich steig wol auff den Baum so bald /
 Vmmer nur von der Welt hinweg
 Sie ist nichts den zur Hellen ein steg /
 Den Baum aber wil ich nauff steigen
 Welcher mir sol den man anzeigen /
 Der mir zum Himmel den weg weis
 Gott dem Herren sey lob vnd preis.

SERVVS ZACHEI.

¶ Gehet heraus vnd suchet seinen
 Herrn / findet ihn aber nicht.

Du wirt mein Herr sein ymmermehr
 Ich hab ihn gesucht hin vnd her /
 Vnd kan ihn finden nirgent nicht
 Es haben ihn vil Leut gesucht /
 Die alle wolten geben Zol
 Das Zolhaus ist doch schier gar vol /
 Mich wundert wu er nur mag sein
 Ist weg gegangen gar allein /
 Das pflegt er sunst selden zu thun
 Ich wil widder zu hause nun /
 Etwan kumpt er schier er ichs mein
 Mag leicht bereit dabeime sein.

EX SCRIBIS ET PHA
 RISEIS.

Primus.

PRIMVS!

Schaw schaw / sich einer wunder zu
Warumb steigt der auff den baum nu z

SECVDVS.

Düncket dich das so wunder sein z
Sichst wie das Nendlein ist so klein /
Ist er doch kaum einer faust gros
Has sorg das ihn einer umbstos.

TERTIVS.

Ich halt das er ein querglein sey
Es solde ihn wol einer frey /
Mit ein Vogel rohr schiffen rab
Mich wundert was er im sin hab /
Vorwar weñ er mirs wolt sagen
Ich dörfft ihn noch wol drumb fragen.

IESVS CHRISTVS.

¶ Siehet vber sich / vnd ersiehet Zache-
um auff dem baum / redet Zacheum an
vnd spricht.

Hör Zachee / sey du zu frid
Steig eilend rab vnd seum dich nit /
Den heut (welchs mir niemadt solwehren
Mus ich zu deinem haus einkehren.

ZACHEVS.

¶ Steiget eilendts von Baum
vnd spricht.

Ach

61

Ach lieber Meister Jesu Christ
Wie ein lieber gast du mir bist.

Q V A R T V S.

Ja zwar ist wol von nöthen das
Das er sich bey dem nidderlas/
Der Zölner ist der beste nu
Was ist das anders/ hört mir zu/
Als seine schinderey vnd btrug
Loben: Als het man des gut fug/
Als wehrs recht gthan/ vnd lobens wert
Schand ist/ das er zu ihm einkehrt/
Zum Obersten der Zölner wol an
Gleich als wehr sunst hie gar kein man/
Zu dem er einziehen künde
Ich gleubs nicht das er ein fünde.

¶ Solchs hat alles dieser dem Zacheo
zu angehör geredet/ Christo dergleichen/dermassen
sen redet nu auch der nachfolgende.

Q V I N T V S.

Wehr der Meister ein redlich man
Er würt nicht vil zuschicken han/
Mit diesem sündler/ nein er zwar
Es bleibt aber das sprichwort wahr/
Gleich vnd gleich gesellet sich gern
Da bleib es bey/ wils ihm nicht wehrt.
Zacheus

ZACHEVS.

¶ Redet zu Christo.

Herre Jesu mein lieber Gast
 Weil du dich mein erbarmet hast/
 Vnd mich angsehn so gnediglich
 Hast mich ia ehr gsehn dann ich dich/
 Der du freylich mein gbrechen all
 Wie ich gleub vnd merck allzumal/
 Weisest vnd siehest Herre mein
 So bit ich/ Las dir buolen sein/
 Mein engstigs hertz/ gib rew on schertz
 Verley auff das michs allzeit schmerz/
 So ich yemandts ye vnrecht gthan
 Es sey nu gleich Weib odder Man/
 So bit ich dich vergib mirs Herr
 Es rewet mich von hertzen sehr/

Wie sol Zachheus Wei
nen.

Vorwar



Vorwar die helfft der güter mein
 Sol nu forthin der armen sein/
 Hab ich auch betrogen yemandt
 Vierfeltig geb ichs widder zhandt/
 Ein grosser sündler Herr bin ich
 Doch deiner gnaden tröst ich mich/
 Das du mir all mein sünd vergebn
 In diesem / da du mich so ebn /
 Mit gnaden angesehen hast
 Bist worden mein gewünschter Gast/
 Nicht aber thustus darumb Herr
 Weil mich solchs schmerzt vñ rewet sehr
 Mein Herr O nein / Dein bloße gut
 Solchs mir aus lautrer gnaden thut/
 Ehe mein hertz ye darzu geneigt
 Alda dein gut mir gnad erzeigt/
 Kan nicht wissen wie ich zu dem sün
 Zu solcher rewe kommen bin/

Hilff das ich bleib bestendig nür
 Ich weis was ich mich sol zu dir/
 Versehen nu in ewigkeit
 Des wil ich warten allezeit/
 In rechtem glauben auff dein Wort
 Welchs ich von dir yezund gehört/

Darauff

Darauffich auch von hertzen bit
 Meister wirst mirs versagen nit/
 Ich bitte dich traut Meister mein
 Dich vnd alle die Jünger dein/
 Du wollest mit mir nach dein Wort
 Zu hause kehren also fort.

IESVS CHRISTVS.

Ich wil es thun merck den bescheid
 Vnd wens gleich wehr ihr vielen leid.

(ACTVS TERTIVS.)

IESVS CHRISTVS.

¶ Gehet widderumb aus Zachei
 haus/vnd redet mit Zacheo wie
 folget.

Zechee lieber Wirt vnd freundt
 Bey dir wir nu gewesen seint/
 Freundlichen danck den soltu han
 Vnd mich also ferner verstan/
 Wie ich zu dir kumb/vnd warumb

¶ Die sol Christus Zacheo die handt
 auff den kopff legen vnd sprechen.

Heut ist diesem hause/ vernim/
 Dir vnd dein ganzen hausgesindt
 Des lieben fromm Abrahams kindt/
 Heil

Heil widderfahren vorwar
 Vnd solchs aus dieser vrsach zwar/
 Weil sich auch hie bey dir ereugt
 Abrahams glauben/ Welcher zeugt/
 Das du sein warhaffter Son bist
 Den des Menschen Son kommen ist/
 Zu suchn vnd selig zu machen
 Das verlorn ins Teuffels rachen.

ZACHEVS.

Tu ist mein gewissen zu frid
 Nim so fur gut von hertzn ich bit/
 Lieber Meister / ich sag dir danck
 Ewiglich vnd mein lebelang.

PETRVS.

So hör ich wol Herr Meister mein
 Das vnser regimente fein/
 Tu schir ein anfang haben wil.

IESVS CHRISTVS.

Lieber Petre / schweig darvon stil.

PETRVS.

Meister verstehs recht was ich sag
 Das Reich Gottes wirt nu an tag/
 Kommen: Vnd offnbar werd'n einmal
 Dis mein ich vnd die Brüder all/
 Das wir doch kemen zu etwas
 Vorwar Meister ich sag dir das/

¶ Wie

Wir sein nu aller freuden vol
hoffen vns sol gelingen wol.

IESVS CHRISTVS.

Ihr redet recht wie arme leut
Wenn wolt ihr auch werden bescheid?
Thut doch auff ewer verstendnus
Höret dis Reichs eine gleichnus.

Ein K. ler Herre wolbekand
Zoch ferne dahin in ein Land/
Auff das er ein Reich einneme
Vnd als dann auch widder keme/
Dieser foddert zehh seiner Knecht
Gab ihn zehh pfundt/verstehet mich recht
Er sprach zu ihnen vmb vnd vmb
Handelt/bis das ich widder kumb/
Lasts euch trewlich beuohlen sein
Vnd legt es wol an allgemein/
Er zog dahin der fromme Herr
Da funden sich seine Bürger/
Die wahren ihm recht spinnen feind
(O Kinder/wehr het das gemeint)
Sie schickten ihm ein botschafft nach
Vnd lieffen mit ihm halten sprach/
Also/Wir wollen kurgumb nicht
Das du vber vns hersche mit icht/

Wie

Wie dünckt euch lieben Kinder mein
 Dis möchten fromme Bürgerle sein.

Es begab sich das er widderkam
 Nach dem ehr das Reich eingenan/
 Vnd hats nu in voller gewalt
 Lies er sein Knechte foddern bald/
 Den er das gelt gegeben hat
 Vnd wolt da wissen auff der stadt/
 Was vnd wie yeder mit dem sein
 Gehandelt hett/ das war nu fein/
 Da trat herzu der erst/ Sprach so
 Herre dein pfund das ist aldo/
 Hat Zehn pfund erworben darzu
 Hab ich recht ghandelt/ das sag du/
 Drauff sprach d' Herr/ Ey dz wehr recht
 Du bist vorwar ein frommer Knecht/
 Im gringsten bistu trew gewesen
 Billich das man dichs gnissen lest/
 Du solt nu macht haben wolan
 Zehn Sted solln dir sein vnderthan.

Der ander kam auch/ vnd sprach/ Herr
 Dein pfund hat fünff pfund gtrage mehr
 Zu dem sprach der Herr auch gar fein
 Vnd du solt vber fünff Sted sein/

¶ ij Der

Der drit kam auch daher vnd sprach
 Ach Herr ich bit thu fein gemach/
 Sich da / allhie hastu dein pfund
 Welchs ich vorwart zu aller stund
 Behalten hab im schweistuch fein
 Ich fürcht mich lieber Herre mein/
 Den du bist ein sehr harter Man
 Scheinst schir als ein halber Tyran/
 Dann es erschreckt mich das gar fast
 Du nimpst / das du nicht gelegt hast/
 Du erndtest auch noch wol darzu
 Welches nicht hast gesehet du/
 Da sprach der Herr zu ihm / Merck mich
 Aus deinem munde richt ich dich/
 Du schalck / Wirstu in deinem sin
 Das ich so ein harter Man bin/
 Nemme / das ich nicht gelegt hab
 Was ich nicht gseht / schneid ich doch ab/
 Warumb hastu den mügen nicht
 Lieber dasselbig mich bericht/
 Mein gelt dahin auch legen so
 In die wechselbankē geben do/
 Auff das / wenn ich nu wehre kommit
 Ichs mit wucher het zu mir gnommit/
 Mein zwar / der auszug hilfft dich nicht
 Höret zu ende dis geschicht/

Was

Was der Herre that widderumb
 Er sprach / Nehmet das pfund von ihm /
 Gebts dem der zehen pfundt hat
 Die Knecht antworten widder drat /
 Herre hat er doch zehen pfund
 Er saget ihn zur selben stund /
 Ich sag euch das fur gwis vnd wahr
 Wehr da hat / Sol mehr haben zwar /
 Ihm sol noch mehr werden gegeben
 Mercket aber auch dis gar ebn /
 Von dem der do hat gar nichts nicht
 Es wird geschehen das mans sicht /
 Sol auch genohmen werden drat
 Dasselbige das er noch hat.

Dis dünckt manchen unbillich sein
 Ja höre ihr lieben Jünger mein /
 Der Edle hochgeborne Herr
 Er thatte noch wol etwas mehr /
 Die frömmichen sein Bürger sein
 Die ihm nicht wolten ghorfam sein /
 Dieselben bösen puben all
 Verderbete er allzumal /
 Lies sie erwürgen allgemein
 Vnd mussten ihm vnderthan sein /
 On ihren danck wie ich euch sag
 Müßens auch noch thun ihr lebtage /
 ¶ iij ¶ In

ch
 b/
 /
 t
 as



In ewigkeit fur ihren Herrn
 Ihn bekennen/ wiewol ungerne/
 Wie ihr ghort/ widder ihrn willn
 Ehr hat sie (mein ich) künnen stilln/
 Wirds mit der zeit noch besser thun
 Aber Kinder es ist gnug nun/
 Von diesem gleichnus yetz gesagt
 So aber ymandes weiter fragt/
 Was den des gleichnus deuttung sey
 So sag ich euch gleich also frey/
 Sein deuttung bringet sie selber mit
 Dann sie ist so gar tuncfel nit.

Vom aller grösten Königreich
 Redet dis gleichnus seuberleich/
 Darvon auch Petrus zuvor red
 Vnd aus vnerstand meldung thet/
 Es folgt aber yetzander nu
 Vnd kumpt ymmer neher herzu/
 Dasselbig Reich (vernempt Geistlich
 Kostet wolan mein leben mich)
 Darin ihr meine Fürsten seid
 Vnd ihr zwene in sonderheit/
 Mein zeug vnd Rüstmeister solt sein
 Petrum vnd Johannem ich mein/
 Meine Marschelck so wolgethan
 Wie ich euch yetz will zeygen an.

Petrus.

PETRVS.

Herr Meister mein was ich thun sol
Das thu ich gern / das weistu wol.

IOHANNES.

Vorwar ich auch O Meister gut
Nichts vberall mich bschweren thut.

IESVS CHRISTVS.

So geht nu in den Marckt hin bald
Wer für euch ligt / Merckt vnd behalt /
Was ich euch werd beuelen mehr
Vnd was ihr mir solt bringen her /
Ihr werdet finden angebundt /
Ein Ruelin zu dieser stundt /
Ein Sullen hart bey ihr / Merckt das
Auff welchem nie kein Mensche sas /
Løset sie allebeyde schir
Vnd bringet sie daher zu mir /
So euch yemandes auch fraget
Warumb thut ihr das ? So saget /
Der Herr bedarff ihr / Hört ihrs wol ?
Als dann ers euch bald lassen sol.

PETRVS.

Herr Meister ia wir wollens thun.

IOHANNES.

So gehn wir mit einander nun.

R iij Jesus

trus.



IESVS CHRISTVS.

Gehet hin kumpt bald herwidder schir
Wir warten ewer alle hier/

¶ Nu redet er zu den Andern Zehn
Jüngern.

Sie werden alles finden so
Wie ich ihn hab gesaget do/
Kein herlein breit solt feylen ihn
Alle ding weis ich zuvorhin.

Ihr wisset nu mein anfang vnd end
Mein vrsprung vnd mein regiment/
Welchs sich nu bald anheben sol
Auff das ich widder kom einmal/
Zu dem der mich gesendet hat
Nemlich durch solch herschafft verstadt/
Darvon ich euch vil hab gesagt
Ehe dann mich ewer einer gfragt/
Ich weis vnd habs zuvor gewust
Das alles so ergehen must/
Auff solche weis vnd anders nicht
Hiernach sich nu ein yeder richt
Denckt/Alles was nu wird geschehen
Das hat solln vnd mus so zugehn/
Auff das Gottes Reich kom heran
Wie ich euch hab gezeyget an/
Ergert euch nur daran nicht sehr

¶ Nu

¶ Nu siehet er Petrum vnd Johans
nem Kommen.

Wolan sie Kommen nu daher/
Sie bringen die Thier allebeid
Herbey ist Kommen meine zeit.

PETRVS.

Meister ein selzam Reutterey
Wir bringen sie allbeyde frey/
Man lies sie vns von hertzen gern
Da wir sagten/sie solln dem Herrn.

IOHANNES.

Man het vns nicht ein wort gesagt
Nur das wir so wurden gefragt/
Wehm wir die Thiere wolten han?
Darnach nam wir sie von stund an

IESVS CHRISTVS.

Ly hatt ichs euch doch so bericht
Das es würd habn kein mangel nicht/
Treibt sie nur neher bas herzu

PETRVS.

Wiltu den bald auff sitzen nu?

IESVS CHRISTVS.

Was anders? Jezund von stund an

PETRVS.

Was wilt den für ein sattel han?

IOHANNES.

¶ v Sich

Sich meinen Rock den leg ihm drauff

IESVS CHRISTVS.

Schweigt nur stil/ last mich sitzen auff.

Hört Zachartas predig schon
 So saget der Tochter Zyon/
 Frewdich sehr/ deins Königs nicht schein
 Vnd du Tochter Jerusalem/
 Jauchze/ Sey aller freuden vol
 Sihe dein König kumpt ein mal/
 Er kumpt zu dir ein gerechter
 Ja er kumpt dir als ein helffer/
 Arm kumpt er dir / On allen pracht
 Darunder doch ein grosse macht/
 Er reit auff einem Esel nür
 Vnd auff ein iungn Füllen bey ihr/
 Dis ist das Edelst Königreich
 Auff erden ist ihm keines gleich.

PETRVS.

Des sey gelobet Gott der Herr
 Es frewen sichs alle jünger/
 Das nu einmal angehen wird
 Vorwar es mir gros freud gepird/
 Glück zu/ dem newen König zart
 Welcher do kumpt zu dieser fart/
 Im namen des Herrn/ anders nit.

Jacobus.

IACOBVS MAIOR.

Ewiglich sey im Himmel fried/
 Ehr in der höhe wolgethan
 Gott sey gelobt im Höchsten thron/
 Der wol vns geben glück vnd heil
 Alle wolfart zu beyden teil/
 VnsERM lieben König vnd vns
 Das ist yetzund mein höchster wunsch/
 Dann so es mit ihm wol zusteht
 Vorwar vns auch nicht vbel geht/
 O lieber Gott hilff vns allen
 Nach deinm götlichn wolgefallen.

IOHANNES.

Jacob Bruder hab gutten mut
 Es wird nu alles werden gut/
 Was wir furlengst gewünschet han
 Das sol vns allen gehen an/
 Der Meister ist nicht so alber
 Lieber er bedencfts wol selber/
 Solt er vns han so lange zeit
 Mit ihm gefüret weit vnd breit/
 Hin vnd herwidder lieber Gott
 So wehrs ia schimpfflich vnd ein spot/
 Das wir nicht mehr solten haben
 Verdient/Wird vns wol begaben/
 Seine

Seine gwaldige zeichen all
 Zeigtens ia an / das er einmal /
 Was anders würd anheben schir
 Wenn wir ihn nur hiltten darfür /
 Lieber er ist ein ander man
 Der etwas anders weis vnd kan /
 Dann gmeine leut / als ich vnd der
 Da Lazarum auffwecket er /
 Da wolt mirs traun anders nicht ein
 Es müst vns gros hinder ihm sein /
 Nu sehn wir was er ghabt im sin.

ANDREAS.

Warlich ich auch ganz frölich bin /
 Ich gdenckt ein wenig hinder sich
 Johannes gleich ermanet mich /
 Des grossen gschichts / das er dort that
 Da er den blindgeborenen hat /
 So fein widderumb sehend gmacht
 Aldo von stunden an ich gdacht /
 Traun lieber Meister kanstu das
 So wölln wir dein geniessen bas /
 Wir wölln erwerb'n gelt / ehr vnd gut
 Dann nu michs nicht gerewen thut /
 Das ich mein netz hab fahren lan
 Sol vns all helffen glenb ich schon.

Philippus.

PHILIPPVS.

Ja zwar er hat sich seiner mache
 Seiner gewalt vnd seiner pracht/
 Bisher nicht so gar mercken lan
 Wiewol er grosse zeichen gthan/
 Ey/ da er dort so vil Volcks speist
 Ich mein das hies sich ia beweist/
 Wir haben ein Herrn/ Brüder mein
 Wir dörfen vns nicht schemen sein/
 Des wir auch ia kein schaden han
 Es wol dennoch anders zu gan.

THOMAS.

Wie kans anders zugehn dann recht
 Wir als sein treweliebe Knecht/
 Wollen ihn vertheydigen wol
 Trutz man ihm ein har krümmen sol.

BARTOLOMEVS.

Ey schweigt nur stil/ darff der wort nicht
 Saget darvon wens nu geschicht.

MATTHEVS.

¶ Siehet hinder sich vnd weisset auff
 den grossen hauffen Volcks.
 Ich sag auch so/ vorwar vorwar
 Seht wie ein gewaldige schar/
 Dies mit vns halten allgemein.

Judas



IUDAS THADEVS.

All recht / wehm wolt leid darbey sein?
 Der Meister ist ein frommer man
 Wird die sach wol recht greiffen an.

IACOBVS. MINOR.

Sie sind alle frölich zu gleich
 An diesem tag so freuden reich.

SIMON.

Sonderlich dünckt michs selzam sein
 Das sie die Meyen vnd zweiglein /
 Auch ihr Kleider legen auff der d.

IUDAS ISCHARIOTES.

O lieber / wehr weis wie langs werd
 Wehr weis.

¶ Die felt der Phariseer einer dem Ju-
 da in sein wort / redet Christum an vnd
 spricht.

EX SCRIBIS ET PHARISEIS.

SEXTVS.

Meister lieber las dir sagen
 Kanstu dis alles vertragen?
 Straffe doch deine Jünger do
 Das sie schweigen / nicht schreyen so /
 Was machen sie doch fürein gsperr
 Wz hilfft doch nur dis gschrey vñ gpler?
 Jesus

IESVS CHRISTVS.

Jch sage euch/ vernempt mich wol
So ich sie schweigen heissen sol/
So werden ia die stein schreyen
Kist der eins vnder den zweyen.

SEPTIMVS.

¶ Redet zu den seinen vnd nicht zu
Christo/dann er siehet vil volcks aus
der Stad kommen.

Wolan seht zu/die ganze Stad
Sich erregt vnd des wunder hat/
Jch hett sorge fur ein rumor
Secht wie dz dolck raus dringt zumthor
Schaw wie doch nur ist ein zulauff
Nu/wird was draus/ so seh er auff.

EX OCCVRRENTIEVS CHRISTO.

PRIMVS.

¶ Redet mit einander.
Wehr ist doch der nur ymmermehr
Der mit solcher pomp kumpt daher?

SECVNDVS.

Das ist der Jesus der Prophet
Aus Galile von Nazareth/
Vnser lieber Messias zart
Der kumpt daher zu dieser fare/
Dieser ist es/ es feilt mir nit.

Tertius.



TERTIVS.

Hoschianna dem Son David.

QVARTVS.

O vnfers Vaters Davids Reich.

QVINTVS.

Es sey gelobet ewigleich.

SEXTVS.

Es kumpt daher ins Herren nam

SEPTIMVS.

Glück Hoschianna lobesam.

OCTAVVS.

Hoschianna in der höhe
Tu ist gestillet alles weh.

Nach diesem weil Chri-
stus so auff dem Esel daher zeucht/
Sol man singen den Hymnum Gloria laus/
Deutsch odder Latinsch / zu deutsch
hab ich ihn hernach gesetzt.

¶ Der Hymnus Gloria laus 2c.

Zu Deutsch.)

Gloria preis vnd ehr
Sey dir heut vnd ymmermehr/
Herr Christ vnser Heyland
Welchem ist wolbekand/

Das

Das schon Gschanna der Kinder gfang

Israhels König bistu zwar
 Entsprungē aus Davids hochem stam
 Gebenedeit sey der offenbar
 Der do kumpt in des Herrn nam.

¶ Welchem ist wolbekand.

Die Engel im höchsten Saal
 Mit Himlischen stim erklingen
 Der Mensch vnd creaturen all
 Von deiner gütte singen.

¶ Gloria preis vnd ehr.

Die Hebreer nach wurden
 Mit palmen dir giengen entgegen
 Wir aber mit begirden
 Uns für deine füsse legen.

¶ Welchem ist wolbekand.

Ihr loben ins gemeine
 Thet dir Herr Christ wolgefallen
 Bist unser König alleine
 Hilff deinen lieben allen.

¶ Gloria preis vnd ehr.

f

Die

Die Juden zu ihener frist
 Lobten dein leyden mit geberden
 Wir aber lobn dich Jesu Christ
 Ein König Himmels vnd erden.

¶ Welchem ist wolbekand.

Gloria preis vnd ehr
 Sey dir heut vnd ymmermehr 2c.

Hierauff folgt / wie der
 Euangelist spricht / als Christus an
 die Stad kommen / sahe er sie an vnd weinet
 vber sie / vnd sprach.

IESVS CHRISTVS.

Jerusalem / nu denck an mich
 Vnd wenn du so vil wüßt als ich /
 So würdts auch noch heut diesen tag
 Bedencken diese meine klag /
 Dis gros vnglück / das ich von dir
 Jetz sagen wil / Welchs vorwar nür /
 Gang sehr zuherzen gehet nun
 Du würdts anders zun sachen thun /
 Würdts deinem fried nachtrachten bas
 Dir ist aber verborgen das /
 Ja du würdts bedencken die zeit
 Wiewols nu fast zu lang gebeit.

Aus

Aus der lieben Propheten lahr
 Köndstus noch lernen / alles zwar /
 Aus meinen predigten dergleich
 Solstus wol mercken seuberleich
 Alles das vnglück vnd vnfal
 Das vber dich ergehen sol /
 Ja so dus selber woltest nur
 Erkennen / hastu gehört zufur /
 Aber ich sag / es sol nicht sein
 Verborgen ist den augen dein /
 Du musts noch solst erkennen nicht
 Vertunfelt ist dir dein gesicht /
 Mit sehenden augn bistu blind
 Vnd deine ohren gar taub sind /
 Kanst diesem bade nicht entgehn
 Es kumpt die zeit vnd wird geschen /
 Das deine feinde werden schir
 Dich vnd deine kinder mit dir /
 Mit einer wagenburg vmbbringn
 Hör mich / fur allen diesen dingn /
 Bistu ia oft gewarnt fein
 Doch wil solchs nicht ins herze dein /
 Du schlegsts in wind / verachst es nun
 Vnd meinst es sey vnmüglich zethun /
 Denck mein darbey / Du wirst erfarn
 Sie werden dir vorwar nicht sparn /
 S ij Sie

Sie werden kommen deine feind
 (Wil dirs nicht sagen wer sie seind)
 Vnd werden dich belagern do
 An allen ortten engsten so/
 Werden dich schleiffen dermassen
 Kein stim auff dem andern lassen.

Wöcht einer fragen wie das kumt
 Es ist am tag/ Vtemlich darumb/
 Du hast gehabt gar lange frist
 Darin du heimgesuchet bist/
 Dieselbig zeit der heimsuchung
 Bringet dir alle irrung/
 Sie bringet dir den bitteren tod
 Sindmal dich heimgesuchet hat/
 Gott der Herre zu rechter zeit
 Durch sein grundlos barmherzigkeit/
 Hat dir gezeigt dein sünden gros
 Abgötterey on alle mas/
 Dein Gotteslesterung so schwer
 Damit du ihm sein göttlich ehr
 Geraubet vnd entzogen so
 Auch andere laster mehr do/
 Hoffart/ neid/ has/ mord/ geiz/ diebstal
 Unzucht/ wie sie heissen allzmal/

Die

Die bind ich so zuhauffen nu
 Mach eine sünde draus / hör zu /
 Weil du dich nie schuldig erkant
 Ob ehr dir wol Propheten gsand /
 Die dich aller der vnart dein
 Haben allzeit erinnert fein /
 Offt vnd dick verwarnet vnd gstraffe
 Welchs doch alles bey dir nichts gschaffe
 Bist so gar vnd anckbar darfür
 Vnd allzeit erger werden nür.

Alle propheten hastu gtd
 Vnd ihr predigt verlacht mit gspöt /
 Sonderlich nu kumpt das darzu
 Das magstu auch wol wissen nu /
 Welchs dann dis allergröste schuld
 Darumb dir Gott ist nymmer huld /
 Weil vnser Euangelium
 Auch bey dir veracht / sich darumb /
 Vnd sunst vmb keiner vrsach mehr
 Ist so erzürnet Gott der Herr /
 Weil du misbrauchst der gütte sein
 So wil er nu der gnaden schrein /
 Auch zuschliessen widderumb
 Vnd sein liebs Euangelium /

S iñ Sein

Sein Göttlich wort nemmen von dir
 Ein andern volck zuwenden schir /
 Das ihm dafür wird danckbar sein
 Solchs sag ich yetzt mit grosser pein /
 Mit grossen schmerzen / Nicht das ich
 Ein freud dran hett / O nein warlich /
 Sonder ich mus dir sagen das
 Das ich mich künne dester bas /
 Gegen dir verwahren / Also
 Das ich dirs heut hab gsaget do /
 Vnd nu an dem verderben dein
 Kein schuld nicht hab / Sie ist nicht meine
 Die schuld die ist dein selber zwar
 Deiner vndanckbarkeit vorwar /
 Schaw / dein reich wird vō dir genomme
 Vnd es sollens ander bekomme /

Jerusalem Jerusalem
 Richte dich nür künlich nach dem /
 Vnd gleubs fur ganze warheit dis
 Es wird dich vbergehn gewis /
 Alles vnd alles was ich sag
 Er ist schön angesagt der tag /
 Der grimmigen zorns vber dich
 Du wirst es greiffen sichtiglich /

Was

Was du noch nie hast glauben wöllt
 Hett ia gemeint / das dich het solln /
 Mein predigen bekern einmal
 Aber ihr seid verstocket all /

Wer verkartter zarter sin
 Lenckt sich nicht / ihr gdenckt nur dahin /
 Wir sein das Volck Gottes allein
 Bey vns ist auch der Tempel sein /
 Solt Gott sein liebes Volck also
 In sein aufferweltes Volck do /
 So gschwind angreifen vnd straffen :
 Das wölln wir nymmermehr hoffen /
 Ey sag daruon wens nu geschicht
 Wolan / Wist ihr wie Oseas spricht :
 Derselb thut euchs klar beweisen
 Hört / Ich wil das mein volck heissen /
 Das gar nicht mein Volck war noch ist
 Vnd mein liebe zu aller frist /
 Welche auch nicht mein liebe wahr
 Vnd sol mich doch erkennen zwar /
 Als ihren lieben Gott vnd Herrn
 Ihr aber werd ausgstossen fern /
 Vnd andere an ewer stad
 Werden eingesezet so drat /
 Darbey wil ichs yetz bleiben lan
 Ihr solt mich bald anders verstan.

Hie

Wie sol Christus allererst
 von dem Esel absteigen / vnd nach-
 mals in den Tempel gehen / Heraus treiben die
 Beuffer vnd verkeuffer / wie folget / Er
 redet sie aber zuorhan mit
 solchen Worten.

Wie greiff ichs an mit euch mörderer
 Heist den das Gottes dienst fördern
 Hienaus hienaus du Teuffels rot
 Fur aller Welt wirstu zu spot /
 Durch den Geist meines mundts solt ihr
 Zu scheitern gehn gewislich schir /
 Hinweg von meinem angesicht
 Ihr verzweiffelten böjewicht.

EX NUMMULARIIS.

PRIMVS.

O weh O weh Meister fahr schon
 Bistu den tol vnd thöricht nun :

SECVDVS.

O zeter nu ist die Mes tod
 Die heilige Mes / Ach gnad ihr Gott.

TERTIVS.

Zeter Zeter vnd mordio
 Wie kommn wir hie zu massen so :

QVARTVS.

O die heiligen Agnus dei

D Sancte

O Sanct Johans Euangeli.

Q V I N T V S.

Ach leyder leyder weh vnd ach
Dis ist vns alln gros vngemach.

S E X T V S.

Da fliegen Taubn vnd hünner hin
Ich recht zum markt gewesen bin.

S E P T I M V S.

Er hat vns alles gelt verschut
Wunder / aus wasser gwalt ehrt thut d

O C T A V V S.

Hat mich gschlagen so leyden sehr
Vorwahr vergebs ihm nimmermehr.

N O N V S.

O die guttn Anthoni messer
Welcher doch ehr gibt vnd besser.

D E C I M V S.

Hat vns recht Ablass brieff abkauffe
Sich nu vorwar ehr vns nochlauffe

I E S V S C H R I S T V S.

Hinweg ihr puben allzusam
Ach das ich euch nicht besser kam.

So steht geschrieben das ihrs wisse
Mein haus dasselb ein bethaus ist /

S v Aber

Aber ihr Gottlosen puben
 Habts gemacht zur mörder gruben/
 Nu kan ichs lenger nicht leyden
 Vnd kans summa nicht vermeiden/
 Aus grossen einer gezwungen
 Vorwar genötigt vnd gedrungen/
 Wehrs lieber vberhaben gwest
 Doch Gottes ehr solchs nicht zu lest/
 Das ich lenger zusehen solt
 Habs müssen thun/machts wie ihr wolt/
 Vnd ist dis noch das furspil nür
 Hab euch daruon gesagt zufür/
 Wie ihr verstoffen solt werden
 Als nie geschach keim Volck auff erden/
 Wens aber wird ans treffen gehn
 So werd ihr ander rüstung sehn/
 Dis ist nur gwest ein Kinderspil
 Darmit ich nu beschliessen wil/
 Vnd truz wolan/hört was ich sag
 Das einer etwas hindurch trag/
 Durch den Tempel nu fort an
 Kurzumb wolan ich wils nicht han/
 Ewer Opffer gfelt Gott nicht mehr
 Es ist fur ihm ein grewel sehr.

Ja wolt ihr von mir wissen frey
 Was ewer Gottes dienst yetz sey/

Lauter

Lauter Gottslesterung vnd spot
 Anders nichtes / Darmit ihr Gott /
 Mehr schend vnd höret dann lobet
 Vnd ob ihr nu gleich sehr tobet /
 Das ich euch ewer Fremerey
 Zerstöret / Es bleibt wol darbey /
 Mein Predigten die ich euch gthan
 Dieselbigen euch zeygen an /
 Warumb ich diesen ernst yetz brauch
 Darnach zum andern werdens auch /
 Die nachfolgenden predigten all
 Die ich euch noch thun mus vnd sol /
 Sie werdens euch wol lernen fein
 Was vnd wu her sey das ampt mein /
 Das ich gar nichts on ursach thu
 Dis habt euch zum Valet nu /
 Zürne odder lacht / frag nichts darnach
 Es ist mir ein geringe sach /
 Eweren zorn harr ich wol ab
 Fur euch ich gar keine schew hab /
 Habt ihr was anzusprechen mich
 Im Tempel findt ihr mich teglich.

pueri



PVERI CLAMANTES IN TEM
plo Hosianna filio David.

PRIMVS PVER.

¶ Redet zu den andern / vnd wei-
set auff Christum.

Dis ist Messias vnser Herr
Vnd vnser rechter Schulmeister /
O lob vnd danck dem höchsten Gott
Der sol vns helffn aus aller not.

SECVDVS.

Seid frölich all mit Jubel schal
Der ist / der ist / der kommen sol /
Allem volcke zu heil vnd trost
Durch ihn solln wir werden erlost /
Vom ewigen tod gleub ich frey
Das Gott ewig gelobet sey.

TERTIVS.

Freyllich ist dis vnser Heyland
Welcher vns von Gott zugesand /
Zu erlösn das Volck Israel
Vnd das zu freyen von der Hell /
Seine werck zeygens vns auch an
Die wir von ihm gesehen han.

QVARTVS.

Wie

Wie gros / herlich / vnd wunderbar
 Ist er doch nur ymmerdar /
 All herrschafft ist ihm vnderthan
 Im Himmel ist sein ewige thron.

Q V I N T V S.

¶ Dieser wendet sich gleich zu Christo
 Grüßet ihn vnd spricht.

Sey Gegrüst ein König der ehre
 Dein Reich das müs sich allzeit mehrn /
 Hoschianna dem Son David
 Du bist ia der vnd anders nit /
 Ein schöpffer Himmels vnd erden
 Hilff das wir teilhafftig werden /
 Aller deiner gütter O Herr
 Verlas vns nu noch nymmermehr.

C A I P H A S.

¶ Redet zu Christo.

Hörstu auch was diese sagen :

I E S V S C H R I S T V S.

Ja / Kan vber sie nicht klagen /
 Doch ihr / scheldens vnd schleg wert seid
 Weil ihr erseufft in has vnd neid /
 Vnd mir solch ehr der Kinderlein
 Die von hertzen rein vnd from sein /
 Nicht /

Nicht ginnen wolt / Sie meinens gut
 Vnd solchs auch Gott gefallen thut.

Warumb seid ihr bitter gen sie ?
 Das mich die lieben Kinder hie /
 Loben / preissen / vnd schön entpfahn
 Dasselb ist recht vnd wolgethan /
 Es mus so sein / anders nicht zwar
 Habet ihr nicht gelesen dar ?
 Aus dem mund der vnmündigen
 Dergleich auch durch die seuglingen /
 Hastu dir ein lob zugericht
 Wißt ihr nicht / das David so spricht ?
 In seinem Psalmbuch so geistreich
 Vnd ihr Hohenpriester zugleich /
 Wolt ihnen solchs verbitten hoch
 Ja darzu auch sehr zürnen noch /
 Ey schempt euch in ewer hertz nein
 Last mir die lieben Kinder fein /
 Zu friden all / das hört ihr wol
 O dder es euch vbel gehn sol /
 Zu vor wahrens die Jünger mein
 In seins die armen Kinderlein /
 Die euch aber nicht zu danck gthan
 Last sie zu frid das wil ich han.

Am

¶ Tu sol er zu den Kinds
dern reden.

Geht hin mein lieben Kinder all
Der liebe Gott euch schützen sol/

¶ Zuseinen Jüngern.
Ich wil dergleichen hienaus gehn
Dahin wol gen Bethanien/
Zu Lazaro mein freunde feint
Vnd wil vber nacht sein Gast sein.

C A I P H A S.

Redet zu seinem hauffen
noch dem das Christus widder in Tem
pel gangen ist / vnd hie kan man abermal mu
tas peisonas mehr haben / das der hauff
als der grösser sey.

Wolan so sag ich das vorwar
Er sols vmb sunst nicht thun / nein / war!
Wir wollen ihm nachtrachten all
Bis wir ihn ergreiffen einmal/
Er thut vns doch sünsten gar ein
Dann wir gar nichts mehr gachtet sein/
Das Volck henger ihm alles an
Vorwar wen nur das Volck het geh an!
So het er lang sterben müssen.

Sanctus.

H A N N A S.

Schweher / mich sol nichts verdriessen /
 Ich helff darzu zur aller zeit
 Das wir ihn sein mit g.egenheit /
 Ergreifen könden das wehr sein
 Dis bedencf ich im sinne mein /
 Wir wollen ezliche zu ihm
 Schicken / in guttem schein vernim /
 Die sollen auff ihn lauren thun
 Vnd ihnen er was fragen nun /
 Ob sie ihn könden bey ein öhrlein
 Erhaschen vnd erschnappen sein /
 So er ihn nicht nach vnserm sin
 Antwortet thet / so het wir ihn /
 Bestricket vnd gefasset schon
 Darnach so hetten wir gut thun /
 Dann solt er vns entkommen niche
 Sunst verlest sich der bösewicht /
 Auff das Volckes menge vorwar
 Welches ihm anhenger ia zwar /
 Wie du auch newlich redst darvon
 Wenn wirs aber so greiffen an.
 Das wirs möchten bringen dahin
 Das wir könden beliegen ihn /
 Vnd bey dem Volck angeben so
 Als wehr er widders Volck / do do /

Dann

Dann möcht es angehn / sunsten nicht
 Das Volck ist auff ihn gar erpicht /
 Es lest von ihm nicht sag ich zwar
 Es solt wol drans werden vorwar /
 Ein lermen vnd rumor glaubt mir

C A I P H A S.

Fur dem graut mir am meisten nür /
 Er solt sunst lang haben sein teil
 Doch gut ding das wil haben weil /
 Es kumpt noch wol sols anders sein
 Darauff wölln wir yetz gehn hienein
 Vnd von der sach rad schlagen all
 Folget ihr Herren allzumal.

(Beschlus.)

A C T O R.

Dis ist der nutz aus diesem spil
 Das wie ich gsagt / vnd sagen wil /
 Wer Christum für sein König helt
 Gesand zu trost der gangen Welt /
 Wie solchs die schrift von ihm anzeige
 Vnd wer sein Wort mit gut geneigt /
 Der hat kein not beid hie vnd dort
 Doch widderumb / Wer Gottes Wort
 Verachten thut / der seh sich für
 Das ihm nicht geh gar vbel schir /

G

Jch

Ich achts fur die nützlichste lahr
 Die vns fur schaden warnet zwar/
 Vnd zeigt vns an vnsern frommen
 Wie wir dann (Gott lob) vernommen/
 Aus dem lieben Euangeli
 Welchs warnet vnd lehrt alle die/
 So in sünden durch Adams fall
 Kommen sind/ Nemlich wie sie all/
 Von sünden los werden sollen
 Wu sie allein nur selbs wollen/
 Durch diesen man Christum genand
 Vom Vater vns zum König gsand/
 Welcher zustöret des Teuffels reich
 Tod/ sünd/ vnd Helle allzugleich/
 Zu nicht gemacht/ das vns nicht mehr
 Kün schaden thun noch schrecken sehr/
 So wir solchs glauben festiglich
 Das er solchs gthan eben durch sich/
 Durch sich selbs/ als ein gwaldiger Got
 Der solchs alles von anfang hat/
 Nach sein willen geoffenbart
 Es solt geschen zur selben fart/
 Wenn nu die zeit erfüllet wehr
 So würde er kommen daher/
 Der Herr aller Herren vorwar
 Der König aller König zwar/

Welcher

Welcher sein Volck würd recht regirn
 Vnd in all gottseligkeit führn/
 Welchs volck ihn würd verachten doch
 Dis sind all Juden gwest vnd noch/
 So sich ergern vnd stossen sehr
 An dem König / vnd seiner leer/
 Weil Keins Königs schein an ihm ist
 Achten sein Wort gringer dann mist/
 Darinn doch sein Krafft allermeist
 Das er sie strafft durchs Wort vñ Geist/
 Vnd ihnen all ihr sünd vnd schand
 Anzeigt / derhalb sey er gesand/
 Des sie doch nicht zu frieden gar
 Hielten ihn also vil mehr zwar/
 Fürn auffrürer vnd Gottslestler
 Bis zletzt das auch must sterben er.

Doch den gwin den sie habn darvon
 Den hat vns Christus gzeyget an/
 Welcher auch der ganzen Welt kund
 Das sie veracht sind als die hund/
 Ausgestossen aus Gottes Reich
 Vnd des Teuffels eygen ewigleich /
 Vnd wehren sie gleich noch einmal
 Gottes Volck gewesen all/

G ij So

So ist ihn solchs widderfahren
 Hettns alles Künnen bewaren/
 So sie nur hetten bus gethan
 Wie sie des wurden gwarnet schon/
 Es wolt aber nichts helffen da
 Gottes zorn müst fort gehen ia/
 Wie es furlangst geweissagt war
 Vnde sind auch nu dahin gar/
 An welcher stad sind kommen wir
 Den dis geschicht auch drewet schir/
 Weil wir auch sind der sünden vol
 Drumb wir vns möchten bekeren wol/
 Vnd Gottes Wort halten in hut
 Welchs vns so treulich warnen thut/
 Er dann der grosse tag des Herrn
 Anbrechen wird/ welcher nicht fern.

Sonderlich vnd zuuoraus zwar
 Ist dis geschicht des Babstes schar/
 All seinem gfind ein gwis fürspil
 So er sich nicht bekeren wil/
 Von seiner Kremercy ablan
 So wirds ihm auch also ergan/
 Gleich wie dem Jüdischn volck geschen
 Das sie müssen zu grunde gehn/

Summe

Summa es wird nicht gschencft werden
 Allen Gottlosen auff erden/
 Das sie Gott vngheorsam sein
 Vnd so vndanckbar allgemein/
 Fur sein liebes Wort/ das man nu
 So gering achtet/ höret mir zu/
 Ich bitt lasts vns bekennen das
 Vnd bus wircken on vnderlas/
 Rechtschaffne bus/ nemlich also
 Das wir vns dem Herren Christo/
 Vndergeben vnd bitten gnad
 Die er nie keim versaget hat.

Niemandt sich hie ausziehen kan
 Wir haben all vnrecht gethan/
 Sunder sind wir alle gemein
 Freylich/ wie wir sein/ gros vnd klein/
 Junck vnd alte/ arm vnd reiche
 Wir habn on das allzugleiche/
 Auff vnserm halse gnug sünde
 Aber diese so gar gschwinde/
 Die Gott fur dhöchste sünde acht
 Die last vns fliehn zu tag vnd nacht/
 Nemlich seines Wortes verachtung
 Last vns yetz die heimsuchung/

G iij Weil

Weil vns Gottes Wort leucht vñ scheint
 Erkennen / als sein lieben freund /
 Als sein lieben Kinder all
 Auff das vns nicht gerew ein mal /
 So wirs nicht warnemmen noch thun
 Exempel sind verhanden schon /
 Die Juden hat gestürzet dis
 Dem Babstumb gehts der gleich gewis /
 Wus nicht ablest von sein wesen
 Wir aber wollen wir gnesen /
 So last vns lieben Gottes Wort
 Dasselb halten fur vnsern hort /
 Vnd folgen dem zu aller zeit
 Auch vnser sünd mit rew vnd leid /
 Fur Gott beichten vnd bekennen recht
 So werden alle sachen schlecht /
 Wils vns alles vergeben gern
 Durch Jesum Christum vnsern Herrn /
 Darfür wir ihm dancken allsamen
 Vnd glaubens fest / so ist's Amen.

Ende.

Dem



Dem Leser.

DEs hab vorm Jar Anno 1544
 Historiam Lazari / aus dem
 II. Capitel Johannis / in Deut
 sche Reime dergleichen gestelt vnd zur
 Action gefertiget / Durch den druck las
 sen ausgehen vnd denen zu Halle zuge
 schrieben / Welche Histori noch dem
 sie gantz hertzlich / lieblich vñ tröstlich
 wol würdig vnd auch nöttig / das sie
 tieff ins hertze eingebildet werde / Ja so
 sie nar oft vnd vielmals gehandelt vnd
 bedacht möcht werden / wehre es so
 viel als der besser / So bin ich nach
 mals vnd sieder des / freundlicher lieber
 leser / aus gunst vnd sonderlicher zuneu
 gung darzu bewogen / dieselbige noch
 einmal Kurtz zu fassen / wiewol ein lan
 ges lied draus worden ist.

Es ist aber der meinung von mir
 nicht geschehen / das man es fur ein
 lied halten odder achten solte / Dann
 es einem yetzlichen wol erlaubet vnd
 G üij nachge

nachgelassen ist / Darans zu machen
 was er wil. Zwar ich mus es wol sel-
 ber bekennen / dz zu einem liedde zu lang
 ist / welchem ich dann gar nichts hab
 abbrechen können / Doch weis ich den
 noch dieses / das ob es gleich noch len-
 ger were / solte es gar niemand erger-
 lich odder schedlich sein / besonder vil
 mehr nützlich / Sintemal ein yederman
 dis sagen mus / das es vil Christlicher
 vnd seliger ist / den Christen auch vil löb-
 licher anstehet / von solchen / das ist
 Geistlichen vnd Christlichen Distori-
 en zu singen / Sonderlich Frawen vnd
 Junctfrawen / ia auch noch wol Jun-
 gen gesellen / als das sie auswendig ler-
 nen vnd singen / die lieder von Herr Dit-
 terich von Bern / vom alten Hilde-
 brandt / von Hertzog Ernst odder von
 dem Ritter aus der Steyermarck / wel-
 che yetz erzalte lieder ia auch zimlicher
 lenge / Schweres thon vnd doch nur
 pul lieder vnd weltlich sein.

Man spricht aber / die schalckheit ge-
 het alle-

het allezeit er vnd besser zu gehöre dann
 ettwas guttes / So sag ich nu darauff
 also / Gott gebe es gefalle wehm es
 wolle / odder auch es lerne dis lied wehr
 do kan / so hab ichs aus Christlicher
 wolmeinung vnd liebe / mit sonderlicher
 lust vnd grossen fleis gemacht. Das
 sichs nu (wie vermeldet) in so vil gesetze
 erstreckt hat / mus man gedencken vnd
 dahin sehen / das die Histori / an ihr
 selbs auch sehr lang im text Johannis
 ist / vnd mit sonderlichem fleisse vom
 Euangelisten beschrieben ist worden /
 Dann Johannes alle wort / geberde /
 seufftzen / ergrimmen / weinen / auch
 schir die gedanken des Herren Christi
 so eygentlich abgemalet hat / das sichs
 zuerwundern ist.

Dasselbige lied nu odder Summa-
 rium der Historien von Lazaro / hab
 ich yetzund zu dieser Action Zachei las-
 sen Drucken / darneben auch zween de-
 fect / so ich in der Action Lazari / her-
 nachmals befunden anzuzeygen bin
 G v willens

willens worden / Vnd ist der erste error
 oder defect im blat 5. pagina secunda /
 da es an einer ziffern feylet / so bey der
 Keim einem stehen sol / als nemlich nu
 merus 4. wie dann zuuor daselbst auch
 etzliche andere ziffern gefunden werden
 welche alle zu ruck wissen in den an=
 dern Prologum / wie man sich darin=
 nen halten sol zc. So sol es nu so ste=
 hen in der Action.

Bisher ist nichts gewesen den not 4.

Die lehrt vns nu ruffen zu Gott.

Nachmals abermal ist der ande=
 re error / in dem allernechsten folgenden
 Keim / welcher dann nicht gar aus ge=
 bruckt ist / da sol man so lesen.

Vnd bey leib von ihm fliehen nicht.
 Solchs weils beyeinander auff einem
 blat / hab ichs nicht wollen verschwei=
 gen / Dann es hat den Actoribus vnd
 mir selbs ein irrung bracht / ehe dann
 ich mich widder drein gefunden hab /
 Sintemal es den gantzen sin / auch die
 ordenung verandert vnd zerrüttet hatte
 welches

welchs doch alles on meinen willen geschehen / Dann ichs eygentlich genug signirt vnd verzeichnet zc. vnd doch gar bald zuuersehen ist / vnd ob nu des mehr odder weniger zu weilen / in solchen deutschen Actionibus gefunden wird / Das buchstaben versetzt odder gar ausgelassen werden / Kans ia ein yeder man so ehrs nur thun wil obseruiren / seiner mutter sprach wol helffen / nach geben / nach dem sinne lesen / vnd was ihm mangelt selbs corrigiren / dem Setzer / Drucker / vnd tichter ein Kleinen feil freundlich zu gut halten / vnd Keinen misgefallen daran haben zc. Darmit Gott beuohlen ewiglich / Amen.

(*)



Folget

**Folget das lied von La-
zarus aufferweckung.)**

SA Lazarus gestorben wahr
Gros trübsal war verhandē dar
Es weint Maria Magdalen
Vmb ihren Bruder Lazaren.

Martha ihr Schwester wol gethan
Des leids sich auch nam hefftig an/
Herrlich sie ihn begrub mit fleis
Nach Judischer art form vnd weis.

Christus der Herr wust alle ding
Vnd das er nicht bald zu ihn gieng/
Das thet er drum weils one not
Die Kranckheit wahr ia nicht zum tod.

Er sprach zu seinen Jüngern fein
Last euch das gar nicht wunder sein/
Lazarus schlefft in süßer rhu
Ist gstorben vnd begraben nu.

Vnd

Vnd das er so entschlaffen ist
 Des bin ich fro zu dieser frist/
 Von ewernt wegen allermeist
 Vnd ob ich nicht bin bey ihm gwest.

Wil ich ihn doch erwecken fein
 Des solt ihr alle zeugen sein/
 Ihr solt es glauben seuberleich
 Ob er nu leit vnd faulet gleich.

Die Schwestern dort verwundert dis
 Das sie der Herr so gar verlies/
 Daraus ihr beyder weh vnd klag
 Nur grosser würd von tag zu tag.

Ihr trost der wahr so gar dahin
 Weil sie hatten verloren ihn/
 Den sie so bald nicht würden sehn
 Ihrn lieben bruder Lazaren.

Dann weil der Herre so verzog
 Vnd Lazarus im Grabe log/
 In vierden tag/ faulet vnd stanck
 Thet ihn das elend grossen drang.

Gleich

Gleich wie auch aller menschen hertz
 So es bey ihm befindet schmerz/
 Denckt es / Gott hab vergessen sein
 Vnd sieht auff sein vnglück allein.

Es thut dem fleisch so mechtig weh
 Wiewol der geist willig (versteh)
 So fern ihn Gott mit gnad erzelt
 On Gottes Wort die leng abfelt.

Gott aber weis zu helffen wol
 Kein zil man ihm nicht stecken sol/
 Drumb kam Christus zu rechter zeit
 Gedacht an sein barmherzigkeit!

Verhanden war die höchste not.
 Da halff er als ein trewer Gott/
 Tröst Martham vnd die Magdalen
 Ober ihrem Bruder Lazaren.

So thut er heut noch diesen tag
 Denckst oft das er dein nimmer mag
 Hilffe dir doch bald weñ dus nit meinst
 Fragt dich warumb du also weinst.

Du

Du sprichst / O almechtiger Gott
 Ich bin in gfar vnd grosser not /
 Wie Martha sprach zu Christo fein
 Es ist gstorben der bruder mein.

Vnd wenn du lieber Herr Christ
 Wehrst hie gewest zu dieser frist /
 Möcht mein Bruder noch leben zwar
 Tu ist es mit ihm aus vorwar.

Wiewol ich weis zu gutter mas
 Du kanst erlangen alles das /
 Was du bittest von Gott dem Herrn
 Wil er dir geben vnd beschern.

Drauff spricht Christus der Herr fein
 Es sol auffstehn der bruder dein /
 Vnd yederman wil helffen Gott
 Der ihm vertraut in seiner not.

Martha sprich / Herr das weis ich wol
 Das mein Bruder auffstehen sol /
 Ich mein aber an ihenem tag
 Am end der Welt wie ich dir sag.

Dis

Dis war wol ein bekandnis schön
 Des wir auch alle hoffnung han/
 Doch meint Christus ein ander sach
 Darumb er zu ihr ferner sprach.

Ich bin die aufferstehung fein
 Es sol erstehn der Bruder dein/
 Ich bin das leben auch darzu
 Jetzt bald solst sehn dein bruder nu:

Dein Bruder ist gestorben nicht
 Wehr in mich stelt sein zuuersicht/
 Der wird leben vnd stürb er gleich
 Gleich wie dein Bruder seuberleich.

Vnd wehr do lebt vnd gleubt an mich
 Der wird nicht sterben ewiglich/
 Mit nichten dich solchs wundern las
 Sag liebe Martha gleubstu das?

Es ist allein der Christen kunst
 Wehr dz nicht gleubt der lebt vñsunst
 Vnd dieser glaub dich selig macht
 In Todets no/ hab des gut acht.
 Martha

Martha ihr antwort richtig gab
 Ja Herre lieber Herr ich glaub/
 Das du bist Christus Gottes Son
 Der in die Welt ist kommen schon.

Vnd dieser glaub ins Menschen hertz
 Vertreibt all traurigkeit vnd schmerz
 So er rechtschaffen ruht er nicht
 Von stunden an heraußer bricht.

Sein nechsten stet zu nutz vnd gut
 Welchen er auch sein trösten thut/
 Er lehrt vnd sagt auch andern fore
 Was er gehort von Gottes Wort.

So kund auch Martha lenger zwar
 Bey Christo nicht beharren dar
 Sie machte sich auff vnd lieff dahin
 Zu ihrer Schwester Magdalen.

Sie zeigt ihr an die neuen mer
 Wie das der Meister kommen wer/
 Vnd saget ihr auch alle wore
 Die sie von Christo hat gehort.

h

Des

Des ward Maria also fro
 Kam zu Jesu von stund an do/
 Vnd fiel zu seinen füßen dar
 Sie sprach zu ihm ganz weinēd zwar

o Herre werst hie gewesen
 Mein Bruder der wer genesen/
 Er wer vorwar gestorben nicht
 Zu dir hab ich die zuuersicht.

Ein schwachen glauben hörstu da
 Gleich wie zuvor in der Martha/
 Wie der auffß gegenwertig baut
 Auffß zukünfftig gar nichts vertran.

Sie spricht / Herr werst hie gewesen
 Mein Bruder der wer genesen/
 Er wer vorwar gestorben nicht
 Nicht weiter steht ihr zuuersicht.

So doch der liebe Herre do
 Hett können helffen Lazaro/
 Ob nicht zu ihm wer kommen er
 Vnd auch gar ausgeblieben wer.

Doch

Doch hat gedult der Herre Christ
 Ob wol der glaub fast schwachlich ist/
 Ds glimmend tocht das lescht er nicht
 Das zstossen rohr nicht gar zubricht.

Solch mitleyden das lahr vns frey
 Das vnser schmerz der seine sey/
 Weil ihm beneben Magdalen
 Auch seine augen vbergehn.

Auch das er in ihm selbs ergrimpt
 Im gar vō nichts nicht anders kimpft
 On zweiffel er bedacht den Tod
 Vnd alle seine angst vnd not.

Die vns auff vnserm halse ligt
 Darfur der liebe Herr so schrickt/
 Von vnser wegen allermeist
 Wird er betrübt in seinem geist

Dann vnser fleisch hat an sich er
 Wir soltens leyden billicher
 Von wegen vnser aller sünd
 Da gdacht er an zur selben stund.

D ij Wcii

Weil er die auszutilgen g'dacht
 So auff vns all hat hergebracht/
 Vnser erster Vater Adam
 Auff vns sein kinder allesam.

Solchs zog ihm Christus zu hertzen
 Ihn iammert sehr vnser schmerzen/
 Wo habt ihr ihn dann hingelegt
 Sprach er / Wer ist der mirs anzeigt.

Sie sprachen / Herr kom du soltest sehr
 Wu er leit vnser Lazaren/
 Also mit ihn zum grabe gieng
 Da wurd gesehen gros wunder ding.

Vil Volcks war auch da verhanden
 Das meist teil mit sünd vnd schanden/
 Wie dann die schnöde Wer let thut
 Die alles schend / wers noch so gut.

Er halff dem der war blind geboren
 Der nie gesehen hat zuuorn/
 Er schaffet ihm ein schöns gesicht
 Das ihm daran gar nichts gebricht.

Kund

Kund er dann auch nicht helffen dem
Das er nicht stirb : Mich seiner schens
So gab die Welt ihr gspot nur dran
Es ist ein loser Zimmerman.

Was meinst das er vil wissen sol
Von Gottes werck : Nichts vberall/
Er geht dahin zum grab / Ich halt
Das er ihn wird erwecken bald.

Eya / mich dincf er lests noch wol
Das er ihn nu erwecken sol/
Doch was Christus im sinne hat
Das werden sie wol innen drat.

Das gspot sol vns nicht fechten an
Das wir drumb wolten abelon/
Zu vben vns mit wolthat vil
Solchs Christus hie nicht haben wil.

Es gieng Christo noch seinem willen
Vnd besser kund er sie nicht stilln/
Er lied vnd schweig / Sie müsten doch
Dasselb sein werck ansehen noch.

D ij Vnd

Vnd ob sie ihm wol glauben nicht
 Doch kōndens nicht vermēn mit icht
 Musten zu schanden werden all
 Alsos alln spōttern gehen sol.

Da sie nu wahren bey dem grab
 Sprach Jesus / hebt den stein herab /
 Vnd das gefiel der Marthen nicht
 Darumb sie zu dem Herren spricht.

Ach Herr was wiltu richten an?
 Vorwar vorwar er stincket schon /
 Er hat gelegen wie ich sag
 Im grab vier ganzer nacht vnd tag.

Ihesus der Herre sprach zu ihr
 Hab ich dir nicht gesagt zufür /
 So du nur glaubtest Gott dem Herrn
 Dein freud' würt sich mit hauffē mehrn

Dein Bruder sol yezund auffstehn
 Solst die heerligkeit Gottes sehn /
 Drauff huben sie den stein herab /
 Wol von des verstorbenen grab.

Christus

Christus hub sein augen empor
 Faldec sein hend / vnd bett zuuor /
 Ein grossen ernst braucht bey der sach
 Mit schönen wortten also sprach.

Gott Vater in des Himmels thron
 Ich dancke dir von hertzen schon /
 Das du mich yetz erhöret hast
 O mein Vater ich gleub das fast.

Ich weis du hörst mich allezeit
 Doch yetzund nu in sonderheit /
 Von wegen dieses Volcks allhier
 Wirdstu gar nichts versagen mir.

Auff das sie glauben allzuhand
 Du Vater habst mich ausgesand /
 Vnd ich thu gern den willen dein
 Zu helffen allen menschen fein.

Das ich des Tods ein Herre sey
 Vnd kün das leben geben frey /
 Das sol man sehn on allen graus
 Drumb Lazare kom bald heraus.

D iiii Vnd

Vnd wie er dieses wort nur sprach
 Den Lazarum man leben | ach/
 Er richt sich auff im grave fein
 Verhüllet war das andlitz sein.

An hend vnd füs auch verbunden
 Löst ihn auff zu dieser stunden/
 Sprach Christus zu den dienern sein
 Vnd lasset ihn nu gehen fein.

Zu haus gieng er von stunden an
 Mit Ihesu Christo lobesan/
 Er dencket ihm gang seuberleich
 Vnd seine Schwestern auch dergleich

Dis gros vnd heylig wunderwerck
 Ist nu zu vnser glaubens sterck/
 Zu vnserm besten ia vorwar
 Zu grossen trost geschehen zwar.

Das wir gleich wie der Lazarus
 Vnd wie hernach Jesus Christus/
 Auch solln erstehen allgemein
 Erlöst von aller vnser pein.

Wehrs

Wehrs noch so heylig vnd sehr gut
 Doch sind / dens nicht gefallen thut /
 Sie solden sich des bessern sehr
 Sie ergern sichs aber vil mehr.

Das sind der Juden gröste hauff
 Von stund an sich die machten auff /
 Siengen zun phariseern hin
 Als bald sie da verklagten ihn.

Die Juden haben ihren lohn
 Vnd mit der zeit besser entpfahn /
 So sind der andern noch vil mehr
 Die dieses gschicht nicht achten sehr.

Wehr sie nu sind das bleib darbey
 Mich düncket das vnnötig sey /
 Sie herzu zelen allgemein
 Doch weis man dz nicht Christen sein.

Vnd ob nu diesen dis geschichte
 Wie man gehort gefellig nicht /
 Doch wahren auch Gottfürchtig leue
 Die solchs sahen mit bsonder freud.

h v Viel

Viel Juden zu derselben fare
 Des Israelis rechte art/
 Die wurden da bekeret fein
 Von stund an glenbig worden sein.

Sie glaubten nemlich das der Herr
 Inesus Christus alleine wer/
 Der solt helffen der ganzen Welt
 Wie er zuvor selbs hat vermeld.

Das er dis kōnd nur alleine
 Erwecken der Todten peine/
 Vnd holen aus der Hellen grund
 Wie den von ihm geschrieben stund.

Glauben an ihn wirckt solche ding
 Ein glenbig hertz solchs nur entpfieng
 Demselbigen wirds gegeben
 Noch diesem das ewig leben.

Das wir nu das auch erlangen
 Von vnser stund ist vergangen/
 So helff vns Gott zum selgen end
 Nem vnser seel in seine hend.

Vnd

Und geb vns dann ein süßen schlaff
 Bis das der hirt all seine schaff/
 Christus der Herr wird bringen fein
 In sein einigen schaffstal nein.

Wenn er sein gleubigen alle
 Erwecken wird dann mit schalle/
 Wie Lazarum hie seuberleich
 Des hoffen wir ia allzugleich.

Gott woll all sündler bekeren
 Den seinen den glauben mehren/
 Durch Jesum Christum seinen Son
 Der fur die sünd hat gnug gethan.

Der vmb der sünd willn gestorben
 Dardurch er vns gnad erworben/
 Helff vns durch sein aufferstehung
 Welch ist vnser recht fertigung.

Dis wirck er durch sein heyligen geist
 Dem wir drumb bitten allermeist/
 Zu glauben den verheischungn sein
 All Christen sprechen Amen fein.

Dierauff

Hierauff mag ein yeder
 ihm eine Melodiam richten vnd mach
 en / wie er wil / Ich wolte wol haben
 lassen eine darzu Drucken / so mir ein gut freund zu
 gefallen funffstimmicht gesetzt / aber aus sonder
 licher ursach hab ichs vnderlassen. Doch kan
 man es singen / vnd schicket sich sehr fein
 vnder die Melodi des Liedes / Vn
 last vns den leib begraben.

¶ Sanct Hieronimus spricht.

Sive comedam / siue bibam / siue ale
 Squid aliud faciam / semper vox illa
 videtur sonare in auribus meis / Sur
 gite mortui et venite ad iudicium. Quo
 ties diem iudicij cogito totus corde et
 corpore contremisco. Si qua presentis
 vite est leticia / ita agenda est vt nun
 quam amaritudo futuri iudicij recedat
 a memoria etc.

¶ Zu Deutsch istis so vil.

So geb ich esse / trinck / schlaff / wach
 So dder was ich ymmermehr mach /
 Die

So leit mir stet fur mein gehör
 Die stim/ Ihr tödten geht herfür/
 Stehet auff vnd kumpt zu gericht
 Keiner mag sich verbergen nicht/
 So oft ich denck an diesen tag
 So zitter ich gar wie ich sag/
 Beid an leib vnde seel schawert mir
 Drumb alle vnser freude hier/
 So wir in diesem leben han
 Die sollen wir so stellen an/
 Das wir des tags vergessen nicht
 Wird sein ein sehr gstrenges gericht 26.

N O T A.

Dieser spruch ein gesetz spruch ist
 Welcher schreckt zu aller frist/
 Die bösen vnd Gottlosen nür
 Aber dargegen haben wir/
 Das liebe Euangelium
 Dasselbig tröst vns widderumb/
 In allerley not vnd vnfal
 Jeder Christ das fein mercken sol/
 Es steht derhalb geschrieben do
 Zu Latein vnd Deutsch heists also.

Spes

SPES MEA CHRISTVS.

Ihesus Christ mein hoffnung vnd trost
 Der hat mich verdampfen erlost/
 Von sünd/Tod/Teuffl/hellischer pein
 Ihm sey lob/preis vnd ehr!allein/
 Wer an ihn gleubt wird nicht gericht
 Er selbs Christus mir solchs verspricht/
 Darauff vertröst ich mich so gar
 Cruz Teuffel krüm mir nu ein har.

(*)

¶ Gedrückt inn der Churfürstlichen
 Stadt Zwickaw/durch
 Wolff Meyerpeck.

1546.



Faint, illegible text, possibly bleed-through from the reverse side of the page.

Faint, illegible text, possibly bleed-through from the reverse side of the page.




Id 1590

ULB Halle

3

003 770 532





Ein schöne newe
Action auff das Xviij. vnd
Xix. Capitel des Euangelisten Lucae ge-
stellet/ vnd Heimweis in drey Actus ver-
fasset/ Allen büßfertigen sündern tröstlich
aber den verstockten Gottes vnd des
Euangelij feinden schrecklich zu les-
sen/ Durch Joachimum Gress
von Zwickaw / yezund
Schulmeister zu
Dessaw.



Auch ein Kurtz Summarium des Xj.
 Capitels Johani / von der aufferweck-
 ung Lazari / gleich als ein Lied ver-
 fasset/ Zu ende dieser Action
 angehenger. .

1546.

Handwritten mark or signature.

